



ル 6  
2529  
38



門九名  
號2529  
卷49-38

吉林通志卷九十七

人物志二十六

國朝十一

達爾漢

鄂羅塞臣

察哈喇

子富喇克塔

葉喜

諸孫陳布祿

恩格圖

甘都

舒賽

子西蘭

哈甯阿

猶子伊克慎  
族孫噶布喇

達珠瑚

子翁阿岱

布丹

法譚

託克推

景固爾岱

從弟崇阿

錫圖庫

康喀賚

子錫納海

孫達理

吉林通志卷九十七

薩壁翰

子喀爾沁  
子扈查祿

孫哈爾弼  
孫孟寶

弟瑚什

費揚武

吳達禮

弟伊博克圖  
子伊爾都 從弟

雅賴 雅海

武善

達爾漢姓郭絡羅氏沾河寨長揚舒

太祖時率所部來歸尙長公主為額駙初隸滿洲鑲黃旗後

改正藍旗從征尼堪外蘭以計破薩爾滸城擒其長

納嗣數立戰功而卒

太祖臨其喪重惜之者其父也達爾漢長公主出初任佐領

尙和碩公主為額駙從征葉赫誅其貝勒錦台什復

累戰功授一等男爵

太宗嗣位擢列八大臣任鑲黃旗都統隨大貝勒代善征扎

魯特部單騎追擒其台吉復征棟揆俘古穆楚赫爾

杜喀爾代青多爾濟三塔布囊父子晉子爵天聰元

年大軍征朝鮮克義定安三州斬其府尹李莞等國

王李倬請和與都統納穆泰等莅盟師旋

太宗宴勞之尋從

太宗攻明錦州有功貝勒阿巴泰以

賜宴時不得與大貝勒並列使達爾漢以恥與子弟雜坐

聞先是

太祖命次子代善猶子阿敏第五子莽古爾泰同

太宗佐理國政以齒稱大貝勒二貝勒三貝勒四貝勒位羣臣上及阿巴泰之請

太宗謂達爾漢曰爾宜勸諭之奏朕何爲未幾察哈爾使臣昂坤等來歸故事當設宴阿巴泰復使納穆泰申前請

太宗以達爾漢有啟導貝勒之責前此不能勸諭而以其言奏

命解都統任尋復之三年從攻明遵化以本旗兵攻北城之西克之明年赦漢奈曼諸蒙古兵攻明昌黎不克詔與都統喀克都哩率千人馳赴至仍相持會永平灤州皆

命班師遂焚其近城廬舍而還五年

太宗詔八大臣陳政事闕失奏言臣以微賤猥廁大臣之列國家果有過舉豈敢不言闕失本無指陳何自至於小民咨怨實有由來從古無政治和平而致怨者臣請自今洗心正己矢公審斷以協羣情凡有所見必舉以

聞用圖報稱其秋從攻明大凌河城以本旗兵圍北隅之東深溝峻壘與都統楞額禮環而守之敵步騎五百出戰率八十人逆擊敗去明日復出再擊敗之敵墮

濠死者百餘明年從

太宗親征察哈爾軍次哈納崖所從蒙古二人盜良馬六奔  
察哈爾告大軍將至林丹汗舉部西驅歸化城富戶  
及牲畜渡黃河而去坐家人漏洩降爵一等男七年  
明登州參將孔有德以所部及戰艦來降奉

命與都統篇古駐兵江岸守其船明年復從征察哈爾遂入  
明上方堡毀邊牆略朔州分兵抵宣府右衛是年  
詔免功臣徭役達爾漢與焉並增給佐領下人戶九年

太宗遣諸貝勒征明山西

命同都統阿山等營明宵錦扼要牽制其兵不得西援遇敵

兵八百擊敗之斬錦州副將劉應選凱旋

賞所俘獲崇德元年都統篇古拜音圖譚泰葉臣阿山石廷  
柱劾都統伊爾登讒謗諸王及大臣事下法司達爾  
漢助伊爾登爲之證辨其辭先後互異坐罰鍰尋隨  
武英郡王阿濟格征明率本旗兵攻順義縣先登晉  
爵一等子旋以克城不謀固守復陷於敵縱兵離伍  
爲敵所殺坐奪俘獲且罰鍰其冬從征朝鮮明年坐  
朝鮮王李倬謁

太宗時亂班釋甲於

朝言不飲酒出輒私飲並失察徇情諸罪應罰鍰追奪

賞賜得

旨罰鍰六年隨鄭親王濟爾哈朗等征明錦州師還坐王召議禦敵不卽至護軍統領鼇拜擊敗明兵謂爲豫親王多鐸所敗且嫉副都統翁阿岱等與諸護軍爭功黜爵罷都統任順治元年卒年五十有五子鄂羅塞臣自有傳

鄂羅塞臣敢戰有父風天聰元年從其父征明錦州有功任護軍參領三年從征明燕京偕護軍統領哈甯阿破巡撫袁崇煥營

太宗嘉之授騎都尉世職明年署副都統事隨貝勒阿巴泰等守永平取糧於野明兵自開平徧至與戰敗之五年從圍明大凌河城數敗城中兵出戰者八年隨貝勒薩哈廉略明山西邊境至崞縣遇敵先衆擊之斬前鋒騎四獲其馬累功晉世職二等輕車都尉崇德元年從征朝鮮與副都統薩穆什克等敗其援兵明年列議政大臣三年隨豫親王多鐸征明甯遠有功既而王至中後所將往會鄭親王濟爾哈朗軍爲明總兵祖大壽所襲參領翁克等及隨征土默特部兵先奔鄂羅塞臣偕護軍統領哈甯阿等且戰且進士卒有死傷者坐削世職罰鍰六年隨征明圍錦州坐

聽從睿親王多爾袞等遣卒私歸及離城遠駐罰鍰其夏復隨鄭親王圍錦州殲明樵采者連敗經略洪承疇松山援兵而祖大壽以步兵出犯我鑲黃旗營我左翼騎兵避敵不與戰同參領阿桑喜率護軍直前搏擊久之敗去肅親王豪格欲爲左翼諱睿親王附和之並使謂鄂羅塞臣曰所敗明兵勿言皆護軍力亦勿言戰時未見騎兵也於是功罪並置明年事

聞

太宗罰睿親王銀五百兩肅親王千兩予鄂羅塞臣復授三等輕車都尉世職擢副都統八年偕參政巴都理征

黑龍江定其地順治元年凱旋

世祖遣近臣明安達禮迎勞以所獲戶口分隸八旗明年隨大軍擊流賊李自成師抵潼關賊嬰城守先登克之斬馘無算五年奉

命統兵駐滄州其冬隨英親王阿濟格擊叛鎮姜瓖明年錄敘世效勞績舊臣晉世職一等

詔鄂羅塞臣和碩公主子

特恩晉男爵世襲罔替尋擢本旗蒙古都統兼刑部侍郎再遇

恩詔晉爵二等子七年坐讞獄徇情罷侍郎任明年授都察

院左都御史未幾罷專管都統事十三年以疾乞休  
慰留之十六年同安南將軍明安達禮率兵駐防荊州會鄭  
成功犯江甯偕明安達禮下援戰揚子江勝之明年  
還京仍任都統康熙三年卒贈太子太保  
賜祭葬如故事諡果敏子鄂忒渾襲貝勒官都統鎮南將軍  
察哈喇父常舒亦長沾河寨蓋揚舒之兄而察哈喇  
於達爾漢則從兄弟也

太祖以常舒爲佐領隸滿洲鑲黃旗後改鑲白旗旣卒察哈  
喇嗣其任

太祖卽位列十六大臣佐理正紅旗事天聰三年從大軍征

明取遵化薄燕京明年旋師取永平灤州

命大貝勒阿敏等守永平都統納穆泰等守灤州以察哈喇  
署都統率蒙古左右翼兵守遵化其夏與都統武納  
格設伏敵樵采所由敗之獲馬二百餘明將以步騎  
四千奪大安口偕武納格與戰斬殪甚眾明兵陷灤  
州納穆泰等走永平阿敏度不能禦檄遵化棄城偕  
歸會敵兵已逼城下同都統鄂本兌等突圍出全師  
以還五年

命都統楞額禮等征明南海島察哈喇率兩紅旗兵與俱次  
海濱獲敵船未足濟師因暫駐敵兵猝渡海來犯佐



領穆世戰沒亟麾眾奮擊而別遣人沈其船敵卻趨  
船不得溺死大半六年隨大軍略明宣府大同邊境  
分兵略歸化城進濱大河

命同承政車爾格以兵五百爲前鋒且備船濟師其冬偕承  
政巴篤理往朝鮮議職貢歲額九年隨貝勒多鐸征  
明錦州與都統阿山參領吳拜等率兵四百前驅遇  
明兵三千於大凌河列陳相持遣騎告貝勒貝勒統  
師馳赴敵望見驚潰與阿山等分道追擊擒斬甚夥  
凱旋分

賜所俘獲逾年卒子富喇克塔任佐領兼都察院理事官崇

德八年擢工部參政兼參領順治元年授正藍旗滿  
洲副都統旋擢本旗都統隨睿親王多爾袞入山海  
關擊敗流賊李自成追敗之望都授騎都尉世職其  
冬隨豫親王多鐸追自成至潼關賊黨劉宗敏據山  
列陳偕都統拜音圖以礮擊潰之賊犯我蒙古營督  
兵逆戰幾盡殲之明年移師征江南與都統阿山馬  
喇希率兵先驅走泗州北淮河橋明兵進克揚州三  
年隨貝勒博洛征浙江以雲梯克處州進征福建偕  
都統漢岱克分水關趨泉州連敗敵眾招撫州一縣  
三兼一雲騎尉五年都統巴哈納等遵例奏授佐領

吉賽爲護軍統領坐扶同解都統任尋隨征南大將軍譚泰討江西叛鎮金聲桓次九江賊眾迎戰擊敗之獲戰艦百餘偕都統何洛會截賊運道奪糧艘二百進攻南昌聲桓與其黨王得仁糾賊七萬離城扼要隘督眾以沙船二十薄其城明年賊平凱旋卒於道先是遇

恩詔晉世職輕車都尉七年論江西功晉一等子福克都襲葉喜者察哈喇從子也父布哈圖世管佐領崇德三年葉喜以前鋒參領從征明有功五年從圍錦州連敗松山援兵順治元年隨英親王阿濟格追流賊至

延安府城內賊兵出犯擊敗之復追賊至承天府獲船四偕前鋒統領哈宵阿自大江追賊至富池口擊敗賊眾盡獲其船復登岸擊賊步騎並敗之三年隨豫親王多鐸討叛酋騰機思戰博爾哈土山手斬七級招降喀爾喀塔什二十五戶進擊土謝圖汗兵陳沒

贈護軍統領

子騎都尉世職猶子額爾遜襲而察哈喇諸孫曰陳布祿崇德閒以佐領兼理事官數從大軍轉戰關內外有功順治三年擊賊漢中偕鄂莫克圖敗賀珍兵隨肅親

王豪格征流賊張獻忠於四川連戰皆勝以功兼兩  
遇

恩詔授騎都尉世職十一年從平浙江舟山晉世職輕車都  
尉十七年卒

恩格圖科沁蒙古人世居哈達

太祖時挈家來歸授佐領隸滿洲正紅旗與參領阿岱駐伊  
蘭布里庫防蒙古游牧者以十人巡徼海濱遇敵百  
人追斬殆盡聞明兵千餘犯海州率兵三百馳擊敗  
之其以少勝眾多類此天聰三年從

太宗征明燕京其總兵滿桂等赴援先眾與戰有功尋薄遵

化破山嶺敵營入大安口並爲軍鋒授輕車都尉世  
職擢兵部承政考滿晉世職二等旋授本旗蒙古都  
統崇德元年隨武英郡王阿濟格征明偕阿岱等分  
率甲士設伏其三屯營守備率兵來偵伏發圍而殲  
之尋與都統譚泰等征朝鮮以雲梯登其城敵兵潰  
走大獲以歸先是隨武英郡王戰松山正藍正白鑲  
白三旗陳亂徇不舉發師旋不俟後隊先行出邊猝  
遇敵戰敗坐奪俘獲罰鍰及征朝鮮在軍方食奉  
召不卽赴且不嚴束步伍致廝卒妄行爲敵所殺論鞭百  
詔免之罰贖三年隨貝勒岳託征明密雲距牆子嶺五里率

兵先諸將越高峯入邊破敵五年隨鄭親王濟爾哈  
朗等圍明松山城敵以夜來襲率本旗兵力戰敗之  
六年從

太宗征明錦州其經略洪承疇合軍赴援營松山  
命與前鋒統領吳拜等分擊之諸軍旣進稱未奉

上命不至所期地將戰披氊而坐遇敵不前師旋論罪應褫

職罰鍰得

旨免褫職罰如律又論攻明錦州敵犯鑲黃旗貝子尼堪失  
察我兵怯戰者徇隱不以

聞應罰鍰

太宗以諸王貝勒及大臣等久駐錦州積有勞勩凡罪宜予  
寬宥於是亦免議

命更番駐守松山順治元年從入山海關擊敗流賊李自成  
明年晉世職一等兼一雲騎尉隨豫親王多鐸追破  
流賊於潼關賊夜犯正黃旗營率兵往援俘斬甚衆  
軍還賊復分躡我後殿而與戰四接皆勝進征江南  
破明將鄭鴻逵於瓜州隨端重親王博洛下浙江大  
破敵衆獲舟三十五旋攻克嘉興府與都統馬喇希  
進圍崑山縣敵兵迎戰連敗之克其城三年晉男爵  
隨征福建偕都統漢岱及副都統鄂羅塞臣招降府

二縣十有三遣軍助擊敵帥吳凱兵萬餘攻克分水關戰南靖縣復捷累功晉爵二等男尋晉一等五年征江西叛鎮金聲桓卒於軍子鄂爾濟圖幼以兄子克什圖襲遇

恩詔晉爵子十八年分授克什圖騎都尉

命鄂爾濟圖襲一等男

甘都蒙古人世居長白山自其高祖遷葉赫遂爲葉赫人忠廉善騎射有名將風見葉赫不足事率眾歸太祖葉赫遣兵要之遂北奔蒙古依巴林台吉以居因通蒙古文以巴林爲氏久之卒來歸

太祖嘉其誠授佐領隸鑲藍旗時天命九年也天聰元年歲大歉斗粟八金傾困贍所屬畜積爲空

太宗特旨獎之以

國賦未充奏請與蒙古諸部落互市懋遷有無財用以足從证明宵遠戰城北山岡執纛者傷取以進敵敗追至城濠三年從克明大安口戰勝玉田縣

太宗旣取遵化簡之以守明年大軍棄遵化出邊以所部殿擊敗敵兵來襲者授輕車都尉世職擢兵部參政考滿晉世職二等尋裁參政改兵部理事官崇德三年隨貝勒岳託证明薄燕京擊其總兵祖大壽及內監

高起潛兵敗之趨山東攻下濟南府明年師還取道  
蠡縣克其城晉世職一等坐他將爭功引證其事罰  
鍰五年從征虎爾哈部索倫兵五百據掛拉爾屯偕  
承政索海理事官喀喀木攻破其柵斬級二百擒二  
百三十人以歸明年從圍錦州明經略洪承疇營松  
山數以步騎來犯擊之並卻去徐騰芳者恭順王孔  
有德長史陷敵陳突入援以出七年錦州下以功兼  
一雲騎尉順治元年從入山海關擊敗流賊李自成  
其冬隨豫親王多鐸追賊至陝西與戰數勝遂克潼  
關取西安明年移師江南偕都統恩格圖馬喇希等

取宜興崑山二縣晉男爵三年隨端重親王征浙江  
追明總兵方國安於黃巖圍之敵勢旣困開一面縱  
之出遂拔其城降偏裨二十兵八千有奇進征福建  
先衆克分水關追明唐王朱聿鍵於汀州降漳州府  
及漳平縣五年征南大將軍譚泰討江西叛鎮金聲  
桓

命以前鋒統領參贊軍務遇

恩詔晉男爵二等尋疾譚泰就視之問所欲曰丈夫死王事  
何憾有弟巴爾賽相從戎馬勞苦甚至願以襲爵委  
署章京恩克參今權所轄佐領勤慎有守願授以章

京子弟不堪任也言竟而卒譚泰歎其公忠並奏如

所請弟巴爾賽襲此據八旗通志滿洲名臣傳云子武山布襲再遇

恩詔晉爵一等兼一雲騎尉

舒賽世居薩克達以地為氏天命四年來歸

太祖隸滿洲鑲藍旗從敗明總兵馬林等於尙閒崖以功授

騎都尉世職尋從征五爾喀多所俘獲晉二等輕車

都尉

太宗踐祚擢列十六大臣天聰元年從征朝鮮師還

命同都統阿山率兵駐守義州八年

太宗征明以鄭親王濟爾哈朗留守

盛京

命與副都統棠阿圖等副之初舒賽以驍勇稱凡攻戰輒被

縣甲先登

太宗壯之又慮其輕進數

詔自愛用是益感奮最其前後所下十六城至是

賜敕晉男爵崇德六年以疾卒順治十二年追諡壯敏於墓

道立碑孫席特庫襲爵與姓佟佳氏者同名子西蘭天聰八年

由佐領授騎都尉世職順治元年擢護軍參領隨副

都統鄂羅塞臣等征黑龍江生擒二十餘人尋隨豫

親王多鐸追討流賊李自成師次潼關三戰皆捷二

年隨貝勒博洛征江南招降松江府移師福建攻平和縣克之以功兼一雲騎尉遇

恩詔晉輕車都尉七年卒長子席特庫既襲祖爵次子阿蘭襲席特庫數征戰有功晉男爵二等

哈甯阿姓富察氏世居額宜湖父阿爾圖山丁未歲率其族攻薩齊庫城殺部長喀穆蘇尼堪招撫三百餘人來歸

太祖以任佐領隸滿洲鑲白旗後分編人戶

命哈甯阿亦任佐領天聰二年隨貝勒岳託征明錦州略松山杏山高橋渚臺堡有功授護軍統領三年從

太祖征明燕京與其巡撫袁崇煥及總兵祖大壽戰廣渠門

外勝之授騎都尉世職明年奉

命以精兵百人略明境五年隨征明大凌河八年隨征明大同先馳至小西城列攻具我軍乘以登尋以二十人出略遇敵兵三百縱擊敗之明年偕承政圖爾格徇地入明山西界師旋過平魯衛敵兵躡我後回軍與戰敵卻追至城濠斬馘無算累功晉二等輕車都尉崇德元年從征明皮島有功明年列議政大臣三年隨豫親王多鐸會鄭親王濟爾哈朗軍征明道出中後所祖大壽輕兵來襲參領翁克及土默特兵先奔



哈甯阿且戰且進士卒多殞坐死

詔免死褫世職籍家產之半明年坐論證明失律佐領阿蘭  
太罪徇庇應死

詔宥而責之六年從圍明錦州其經略洪承疇集兵十三萬  
赴援

太宗親統大軍環松山而營度明兵且遁

命同護軍統領鼇拜率左翼軍陳右翼地右翼軍以次遞列  
屬之海濱夜漏下敵果循海走率軍掩擊敵自蹂躪  
死者枕藉尋進攻松山累戰皆捷

惠敏恭和元妃之喪隨武英郡王阿濟格守高橋輔國公

扎喀納於軍中歌舞坐不舉劾逮繫尋釋之八年偕  
護軍統領阿爾津征虎爾哈部獲男婦二千五百有  
奇牲畜貂皮無算閱五月凱旋被

優賚順治元年隨睿親王多爾袞入山海關擊流賊李自成  
追至望都大破其衆又偕都統譚泰率前鋒兵追敗  
之正定賊焚輜重遁明年復授輕車都尉世職是年  
擊賊綏德州賊望風遁追敗之延安府城中出援犯  
我左翼軍擊之卻走時自成遁武昌追之道有賊衆  
二百餘圍我軍五人馳騎援以出無敢撓者進至安  
陸獲賊艘八十旋與譚泰合兵下江南戰揚子江奪

敵戰艦追至富池口敵陳岸上與戰再勝三年隨順承郡王勒克德渾征湖廣流寇僞伯吳汝義降其眾復晉世職爲二等其夏隨肅親王豪格擊敗叛鎮賀珍於漢中逐北至三寨山山勢壁立賊黨武大定據之未可攻圍之數日僞遊擊周克德遣子來降導軍由僻徑登其守將石國璽爲內應偕副都統阿拉善署護軍統領噶達渾以兵六百攀壘入賊自山墮崖下者纍纍斬刈略盡進征張獻忠戰夔茂資三州及遵義並捷五年師旋晉世職一等卒年六十子率顏襲伊成格者哈甯阿弟也天命初以佐領從征伐越

天命崇德至順治初累立戰功子雲騎尉世職子伊勒慎襲康熙元年從征雲南二十九年從征噶爾丹戰烏蘭布通並有功由佐領洊擢西安副都統遷護軍統領旋擢都統三十四年再征噶爾丹撫遠大將軍費揚古統師西路

命參贊軍務有功晉世職騎都尉尋以年老致仕而哈甯阿族孫噶布喇順治六年從征大同叛鎮姜瓖再戰皆勝進至汾州進士鎮復敗之以功兼遇

恩詔授騎都尉世職所任未詳嗣數立戰功十六年從征福建攻鄭成功於廈門成功列戰艦六百艘於海上以

拒擊之小卻尋偕佟濟等往蓋峙山遇敵與戰沒於  
陳

卹贈二等輕車都尉子噶林襲

達珠瑚姓兆佳氏世居訥殷祖曰達爾楚

國初來歸後隸滿洲正藍旗達珠瑚初任佐領從

太祖征烏喇斬級四十大軍克西林屯俘其人戶以歸敵眾  
追襲回軍與戰敗之斬級五十尋率所部征葉赫斬  
級三百俘五十人遇越界采獲者斬三十級俘六人  
其戰甯古塔尤力功尤多敵來侵率護軍出禦陳斬  
其將一兵百獲甲百副馬三百累授男爵天命十年

率兵征東海瓦爾喀凱旋

太祖出郊宴勞之明年征卦爾察部俘獲無算

太宗嗣位擢列十六大臣天聰元年從征朝鮮克義州留兵  
駐守

命分統之尋復征瓦爾喀部大獲且旋師爲俘卒所害年六

十有三子翁阿岱襲順治十二年

世祖與英古爾岱論國初功臣稱達珠瑚之忠追謚襄敏視  
一品大臣例於墓道立碑先是天聰八年

太宗命征瓦爾喀

諭諸將曰前所遣達珠瑚疏忽遇害念其久著勞績許承襲

世職爾等無達珠瑚之功儻不自慎欲希格外之恩不可得也翁阿岱初任佐領既襲父爵管參領事隨都統巴奇蘭薩穆什喀征虎爾哈部有功兼一雲騎尉崇德三年授工部副理事官明年擢都察院參政兼本旗副都統五年奉

命同副都統多積禮率兵防禦錦州稽察叛逃明年大軍圍錦州營城南山巔明經略洪承疇集援師松山以步兵來犯我左翼禦之失利時守右翼率兵突出敵卻追擊之山下敗其騎兵復與參領鼇拜率護軍破敵步兵營事

聞被

優賚尋合兩翼兵擊敵松山薄營力戰殞焉

賜銀千兩晉爵一等男無子以弟之子濟木布襲

布丹姓富察氏世居葉赫故烏魯特貝子也天命七年率所部歸

太祖分轄葉赫人戶爲佐領後隸滿洲正紅旗天聰八年以前鋒參領從征明大同攻萬全左衛城先登克之被優賚子雲騎尉世職明年隨貝勒多鐸征明錦州師旋敵猝來襲都統石廷柱所部有被敵圍者陷陳援之出時太宗別遣師由歸化城征明山西

命與前鋒參領吳拜率兵百人駐上都城舊址偵軍事會奏捷使至與俱還崇德元年隨武英郡王阿濟格征明將入邊擒邏卒進敗敵騎兵連取雕鶚嶺長安嶺二城並先登轉戰至涿州擒斬無算師還敵潛出居庸關設伏要劫我輜重至則擊走之四年同前鋒參領沙爾虎達等率土默特兵二百略甯遠北界敵堅壁不出獲其樵采者以歸明年大軍圍錦州敵離城築臺相犄角偕前鋒參領納海色赫蘇爾德馳擊斬四十人又邀斬樵采者稱是敵再以三百騎至擊卻之尋與納海等往小凌河明總兵祖大壽遣蒙古十七

人自錦州至殲之六年明經略洪承疇集援兵松山犯我前鋒偕諸參領禦之有斬獲尋擊敗杏山後敵騎明年錦州下論功晉世職騎都尉隨饒餘貝勒阿巴泰征明入黃崖口趨薊州擊其總兵白騰蛟白廣恩等軍敗之斬獲甚眾順治元年隨睿親王多爾袞破流賊李自成黨唐通於一片石遂入山海關追賊安肅及望都連戰皆捷以功兼一雲騎尉並世襲罔替數遇

恩詔晉一等輕車都尉九年擢本旗蒙古副都統十一年卒賜祭葬如故事諡勤毅子翊素理襲

法譚姓他塔喇氏世居長白山之瓦爾喀後隸滿洲  
正紅旗初以護軍校從

太祖滅葉赫取明遼陽以功任佐領天聰元年從

太宗征明宵遠敗其兵於城北山岡射殪六人手刃二脣亦  
爲敵傷

賜馬二七年子騎都尉世職崇德三年隨貝勒岳託征明入  
自牆子嶺敗密雲步兵趨山東攻郟城縣下之明年  
隨承政薩穆什喀索海等征虎爾哈部攻克雅克薩  
城六年大軍圍錦州明經略洪承疇據松山以兵犯  
我右翼隨肅親王豪格擊卻之既大軍分圍松山敵

攻我前鋒營爲我軍所敗將奔塔山偕眾邀擊明兵  
赴海死者無算八年隨鄭親王濟爾哈朗征宵遠攻  
下前屯衛中後所二城順治元年任參領兼工部理  
事官從入山海關以步兵擊敗流賊李自成兼一雲  
騎尉明年隨順承郡王勒克德渾征湖廣三年自成  
黨一隻虎犯荊州逆蹂其營賊敗潰逐北至宜昌自  
成弟李孜及僞磁侯田見秀僞義侯張耐等並率眾  
降考滿晉世職輕車都尉五年擢右翼步軍統領三  
遇

恩詔晉世職一等兼一雲騎尉康熙元年以病致仕五年卒

年六十有四

賜祭葬如故事分世職以子鄂德襲三等輕車都尉色勒壁

襲騎都尉兼一雲騎尉

託克推世居虎爾哈以地爲氏兄納罕泰長其屯天命四年同攜親屬及所部百餘戶來歸

太祖遣官迎之

御殿賜宴及裘服奴僕田宅器用馬牛授納罕泰理事大臣而以託克推任佐領隸滿洲正紅旗天聰三年遷護軍參領從征明入自龍井關遇三屯營哨卒斬五人獲馬七奉

命護糧敵兵來劫斬數人奪其囊遂卻去進會大軍攻克遵

化州五年偕參領榜素等以兵百人至明錦州斬其哨卒擒閒諜以歸其秋

太宗統師圍明大凌河城

命隨貝勒阿濟格率兵扼錦州松山要擊明兵赴援者敵自錦州來犯與戰敗之追至城下斬獲甚眾八年同都統阿山等略錦州多獲牛馬秋從

太宗征明大同凱旋出尙方堡遇察哈爾諸宰桑來歸命率兵護其家屬還

盛京累功子騎都尉世職明年偕護軍統領布哈等略

明邊境至甯遠獲馬牛百數擒七人既出邊敵兵千人來追布哈殿後戰死與參領阿濟拜及哈坦并力還擊敵敗去以所獲分

賚之崇德三年隨貝勒岳託征明由牆子嶺入邊越燕京趨山東圍臨邑縣督所部以雲梯攻克其城

賜良馬及銀明年擢本旗蒙古副都統崇德六年隨睿親王多爾袞圍明錦州擊其經略洪承疇援兵卻之猝爲敵礮所中明年以創解副都統任順治元年起爲

陵寢總管明年卒年六十有三子摩和託襲

景固爾岱姓扎庫塔氏居虎爾哈部烏喇嘗招之降

不從及

太祖遣兵征東海渥集部聞之徒步來歸隨征虎爾哈部追獲叛人偕眾攻取烏爾固辰路擒斬甚眾遂攜親屬及所隸三十戶俱西任佐領後隸滿洲正白旗天命三年從

太祖征明入自雅鶻關攻河城克之擢參領仍兼佐領大軍取遼陽瀋陽並在行間有功授二等輕車都尉世職天聰八年

命同參領吳巴海率兵四百征瓦爾喀部招降屯長芬達哩及其眾五百餘戶俘阿庫里尼滿部千餘人獲貂虎



等皮無算明年凱旋

命禮臣設宴迎勞卽以所獲分

賜晉世職一等崇德二年隨武英郡王攻明皮島克之

賜裘服鞍馬銀布駝牛諸物順治七年九年三遇

恩詔晉爵至二等男十一年卒

賜祭葬如故事諡曰忠直崇阿者其從弟也初任佐領天聰

八年從征明大同略回雁堡我軍數人爲敵所圍怒  
馬抉其圍援出之崇德元年從征朝鮮破敵桃山村  
六年隨鄭親王濟爾哈朗圍明錦州有蒙古烏巴什  
等遣人約降我軍克其外郭敵猶巷戰偕眾擊敗之

明年隨貝勒阿巴泰征明敗敵渾河轉戰至山東壽  
光縣子雲騎尉世職順治元年旣入關隨豫親王多  
鐸追流賊李自成至潼關連敗賊眾明年從大軍進  
浙江攻拔湖州府移師福建擊敗明唐王朱聿鍵兵  
於福甯晉世職騎都尉五年隨征南大將軍譚泰討  
江西叛鎮金聲桓敗賊黨王得仁於南昌其冬廣東  
叛鎮李成棟犯贛州以應聲桓同副都統覺善往援  
會巡撫劉武元總兵胡有陞等內外夾擊成棟大敗  
單騎遁明年破賊兵二萬於南康進圍信豐克之成  
棟墜水死凱旋以功晉世職輕車都尉數遇

恩詔晉世職一等景固爾岱之卒也無子以崇阿襲二等男爵別以其弟之子巴音布襲一等輕車都尉十三年以景固爾岱親弟之子富勒都襲二等男爵仍復崇阿一等輕車都尉康熙十八年崇阿以疾乞休子采柱襲

錫圖庫姓烏札喇氏世居烏喇

據滿洲名臣傳八旗通志云黑龍江人

兄福蘭當

太祖時率屬來歸子騎都尉世職後隸滿洲正白旗尋卒錫圖庫襲焉任佐領兼前鋒參領天聰四年大軍旣取明永平偕參領圖魯什等率兵徼巡敵境擒哨卒二

獲馬十有七明年奉

命偵敵大凌河得其要領道擒二人還旋從

太宗圍大凌河城擊敗錦州援兵六年從大軍征明宣府大同分略邊外多所俘獲八年偕諸將略蒙古錫爾哈錫伯圖地斬七十餘級獲戶口百餘及牲畜以還分賜所獲累功晉世職一等輕車都尉九年同前鋒統領勞薩等入明邊克長城略代州朔州斬獲甚眾崇德元年隨睿親王多爾袞征明甯遠以二十人爲大軍先至中後所及山海關東數擒哨卒獲其馬遇敵前屯衛設伏擊敗之二十人無傷者初喀木尼漢部葉雷等

來歸居多博科地尋盜科爾沁部馬挈妻孥遠遁追者輒爲所害奉

命率前鋒護軍往甯古塔會副都統吳巴海躡之事具吳巴海傳明年師還

太宗遣大臣迎五里宴勞晉爵一等男五年偕護軍統領濟席哈率所部並徵外藩敖漢奈曼烏喇特諸部兵征索倫部敗之於甘河擒叛酋博木博郭爾之弟布固德復追擒博木博郭爾籍戶口千餘獲馬數百明年師還

賜宴北驛館晉子爵擢本旗副都統七年隨貝勒巴泰征明

由薊州越燕京攻山東兗州克之坐所率右翼兵不與左翼期會先出邊應罷副都統任

詔從寬罰銀百兩明年擢前鋒統領順治元年隨睿親王擊敗流賊李自成黨唐通於一片石入山海關追賊於三河擒其遊騎敗之安肅獲馬百餘進征山西同都統葉臣等取太原擊敗僞磁侯田見秀於汾州又敗賊絳州論功晉爵二等子時自成據陝西大軍由潼關綏德兩路分進率兵會之至延安擊賊眾大捷自成遁湖廣移師安陸至荆門殲賊無算獲船百餘三年隨肅親王豪格征四川滅流賊張獻忠晉爵一等

子五年隨鄭親王濟爾哈朗征明桂王朱由榔時湖南郡邑多爲所據明年師次長沙偕前鋒統領努山先以兵渡江攻湘潭努山破北門錫圖庫破西門下之進克永興斬其總兵尹舉智杜貞明等獲馬七十船四百尋偕諸將定寶慶府及全州敵將焦璉等分三路來犯率所部擊卻之進克永安定道州七年凱旋

坐死

康喀賚姓瑚爾喀氏或曰虎爾哈氏世居新達謨

太祖時舉族來歸會初立佐領俾任其一隸滿洲鑲藍旗屢從征伐有功天聰元年

太宗嗣位設八大臣總管政務每旗一又設十六大臣理事聽訟每旗二於是與舒賚任鑲藍旗理事聽訟大臣有蒙古十五人自奉集堡叛逃偕正白鑲白兩旗大臣阿達海吳拜追之不及集眾至都爾弼十五人還鬪吳拜傷於槍不退康喀賚益奮併力與阿達海殲之事

聞被

優賚五年初設六部每部一員勒總管部務次日承政於是

與蒙阿圖祝世充囊努克爲工部承政崇德三年重定官制部留承政一改授本旗滿洲副都統尋卒子錫納海天聰九年隨睿親王多爾袞征察哈爾招降林丹汗子額哲以還時每旗選二十人爲王府護衛錫納海與焉崇德三年隨睿親王征明越燕京由臨清直抵濟南五年隨鄭親王濟爾哈朗圍明錦州並有功鄭親王奏授二等護衛父卒襲管佐領明年復隨鄭親王圍錦州克其外郭明經略洪承疇率兵赴援同前鋒統領努山往偵遇其哨騎於杏山擊敗之獲其一騎旣而我左翼設伏松山以前鋒軍誘其援

兵至夾擊敵潰走奏捷

盛京還赴軍襲獲甯遠哨卒順治元年隨睿親王入山海關擊流賊李自成敗之追至望都多所斬馘子雲騎尉世職遷二等侍衛六年從平湖南凱旋兼任刑部郎中尋擢一等侍衛兩遇

恩詔晉世職輕車都尉十七年擢本旗滿洲副都統康熙元

年同靖西將軍穆里瑪征郟襄流賊郝搖旗李來亨等三年會陝西湖廣四川三路兵討平之斬搖旗來亨走死茅麓山十年以疾乞休十二年卒

賜祭葬如故事孫道福色襲

孫達哩姓魯布哩氏世居葉赫

太祖取葉赫籍其人戶隸滿洲正黃旗以選充驍騎從征伐  
每戰爲軍鋒雖創不退數被

賞賜崇德三年隨睿親王多爾充征明由青山口入邊越燕  
京轉戰至山東攻濟南府克之明年凱旋論功以弟  
一人先登

賜號巴圖魯授二等輕車都尉世職兼管佐領順治七年任  
戶部理事官明年遷護軍參領三遇

恩詔晉爵至二等男十二年擢本旗滿洲副都統十六年遷  
護軍統領康熙二年流賊遺孽劉二虎郝搖旗李來

亨袁宗第等聚匿歸州興山間

聖祖以都統穆里瑪爲靖西將軍都統圖海爲定西將軍統  
八旗兵赴湖北會陝西四川兵合剿

命孫達哩領護軍與俱既至戰數勝破其茅麓山老巢賊平  
乃班師十二年

詔獎久著勞績諸大臣加太子少傅十四年卒年七十有三  
賜祭葬如故事諡曰果壯子杭書襲改隸鑲白旗

薩璧翰姓納喇氏先世居輝發父三檀

太祖時率屬來歸任佐領隸滿洲正藍旗既卒薩璧翰與兄  
薩珠瑚授佐領輝發納喇氏族姓亦繁類爲

國爪牙殉疆場蓋有足多者

太宗嗣位以薩璧翰列十六大臣管本旗副都統事天聰五年擢戶部承政從

太宗圍明大凌河城其總兵祖大壽遣兵出犯禦之舍騎步戰薄其濠獲敵馬敵城上施礮石我軍有巴遜者沒於陳突入取其尸以還八年

太宗親征察哈爾以貝勒濟爾哈朗留守

盛京

命與副都統蒙阿圖副之考滿予騎都尉世職崇德二年大軍征朝鮮及明皮島凱旋與薩珠瑚舉貝子碩託匿

貝勒岳託所產馬及以死皮島廝役六人詭稱甲士冒領賞賚碩託坐罰鍰薩璧翰族屬初隸碩託下至是奉

命改隸饒餘貝勒阿巴泰旣而猶子吳達禮隨征朝鮮攜蓋州駐防甲士爲廝役事覺坐失察革世職明年裁六部承政各一員改吏部右參政四年列議政大臣六年大軍圍明錦州其援兵自松山至與戰被創卒於軍子漢楚哈承管佐領次子喀爾沁亦任佐領康熙十三年擢護軍參領從討逆藩吳三桂攻沅江縣被創

賚銀五十兩先後得功牌三十六三十五年隨撫遠大將軍  
費揚古征噶爾丹戰於昭莫多有功予雲騎尉世職  
漢楚哈子哈爾弼任一等侍衛康熙十八年隨甯海  
將軍喇哈達征福建戰廈門陳沒

卹贈雲騎尉世職吳達禮自有傳見後瑚什費揚武並薩壁  
翰弟也費揚武亦自有傳瑚什崇德二年以護軍參  
領隨貝子碩託等征明皮島戰沒海上

卹贈雲騎尉世職子扈查祿襲六年從征明錦州順治元年  
從入山海關擊流賊李自成並有功兼七年九年三  
遇

恩詔晉世職一等輕車都尉歷官至副都統康熙十二年卒  
於官

賜祭葬如例子扈必漢襲次子孟寶任侍衛康熙十三年亦  
署參領從征逆藩吳三桂戰岳州陳沒

卹贈雲騎尉世職例不得傳以死事書之

費揚武以護軍校累遷參領崇德七年

太宗命饒餘貝勒阿巴泰征明以所部從甫入邊明山海關  
總兵馬科迎戰擊敗其眾遂越燕京趨山東既至膠  
州敵兵千餘屯城外與戰敗之乘勝薄濱州磨兵樹  
雲梯先登攻克其城師還明總督范志完總兵吳三



桂等分兵扼我歸路軍進輒以所部先驅並破走之比出險則爲後殿輜重及所俘獲無或失者予雲騎尉世職

太宗以賞薄

命管佐領事順治元年

世祖嗣位遣睿親王多爾袞應吳三桂之請率師入山海關從破流賊李自成騎兵追擊至望都復敗之尋署護軍統領隨豫親王多鐸追剿自成於陝西師次潼關賊將劉宗敏等以眾拒戰率本旗護軍陳山下步騎迭來犯連敗之進破其二營明年春豫親王移征江

南仍以所部從至揚州偕護軍統領固納岱伊勒都齊等攻城南隅獲船甚夥師因以濟偕護軍統領阿爾津追明福王朱由崧於蕪湖其總兵黃得功迎戰中流矢死擊敗其眾獲船三十有奇尋隨端重親王博洛征浙江偕前鋒統領鄂碩副都統卓布泰等擊走明大學士馬士英於杭州擒其總兵一旋剿海甯平湖二縣土賊平之獲明總兵王之仁戰艦十有六其冬授議政大臣先是論入關破流賊功晉世職騎都尉至是論平江南浙江功兼一雲騎尉世襲罔替四年大軍征福建

命仍署護軍統領與俱以疾卒於軍

特旨遣官致祭

吳達禮薩珠瑚次子既從其祖三檀來歸任前鋒侍衛兼王府長史崇德八年擢國史院學士順治元年隨豫親王多鐸征河南陝西明年移師江南三年隨端重親王博洛征福建時明唐王朱聿鍵稱號福州爵鄭芝龍爲平國公大軍入閩聿鍵死芝龍擁兵觀望端重親王遣赴泉州招之芝龍降四年考滿予雲騎尉世職五年擢工部啟心郎八年調刑部三遇

恩詔晉世職輕車都尉十一年

世祖以八旗逃人日眾增設兵部督捕侍郎郎中員外主事等官別置廨署專理緝捕事擢爲左侍郎十三年以督察不嚴逃人緝獲者少坐贍徇降世職

詔以洗心滌慮改過自新會考滿廕一子入監其冬與右侍郎梁清遠疏陳四事一申禁奸棍窺探緝獲之犯一嚴懲解役疏縱窩盜之人一分晰誣告逃人坐罪之條一增許逃人自首銷檔之例得

旨如所請行十七年甄別部院諸臣以職司督捕弗任勞怨下部議處降世職爲騎都尉改通政司通政使

聖祖卽位擢吏部侍郎康熙五年因病解任八年起刑部侍

郎旋擢工部尚書十四年轉刑部十六年轉禮部尋  
轉吏部二十年致仕卒

賜祭葬如故事孫阿林襲厯官護軍統領吳達禮弟曰伊博  
克圖累從征伐有功順治六年游任護軍參領再遇  
恩詔予世職騎都尉十一年從大軍征福建鄭成功師次烏  
龍港敵來拒眾不克渡以精銳八十人先之擊敗敵  
兵千餘戰福州及高溪並捷斬其總兵藍作霖等獲  
船二十八艘以署護軍統領偕征東將軍濟席哈  
討山東土寇于七有功尋坐事黜康熙九年超驍騎  
參領十三年署副都統隨順承郡王勒爾錦征逆藩

吳三桂克岳州十九年還京卒兄伊巴漢子伊爾都  
以護軍參領兼佐領康熙十三年隨康親王傑書征  
逆藩耿精忠戰沒

卹贈騎都尉世職雅賴

與 賜姓 覺羅者同名

吳達禮從弟也康熙十

三年逆藩吳三桂叛以王府長史奉

命署副都統與一等待衛阿喀尼率兵駐防兗州尋

詔移鎮江甯又移江西南昌府其冬

命討彭澤湖口賊敗之小姑山賊守彭澤縣力攻克之進復  
都昌縣招撫康山餘黨軍事小定爲疏通水道民賴  
之明年偕護軍統領郎素等進討湖寇連戰烏歸寨

等處斬級二萬餘獲船九百復餘干縣進取廣昌至石峽陷賊伏中隕於礮

卹贈騎都尉世職

賜祭葬如典禮諡曰襄壯子班弟襲雅賴弟雅海任前鋒參領順治十七年隨安南將軍宗室羅託征福建破鄭成功於廈門獲船六百康熙十四年察哈爾部布爾尼叛隨信郡王鄂扎往征破賊於大魯累功予騎都尉世職

武善姓伊爾根覺羅氏世居呼納赫父噶蓋

太祖時來歸隸滿洲鑲黃旗從征兆佳城及攻訥殷之佛多

和寨取安褚拉庫路並有功游列十六大臣奉

命與額爾德尼參訂

國書未歲坐事死先是大軍滅哈達擒其貝勒孟格布祿以歸旋謀逆噶蓋與善故坐之武善其長子初任佐領尋兼參領天命九年明皮島總兵毛文龍遣兵渡鴨綠江屯田諸島

太祖命與副都統楞額禮率兵襲擊斬級五百餘且焚其積聚事具楞額禮傳旣而文龍復遣兵渡島焚房舍掠牛馬偕護軍參領滿都禮等率兵追之斬遊擊備禦各一千總二悉奪所掠以歸

太宗踐祚擢列十六大臣

命與諸將分略明錦州偕都統阿山率所部爲後隊受

方略相機設伏防護所俘還奏稱

旨授輕車都尉世職崇德元年我使臣以互市至朝鮮義州

偵知明兵潛入鹹場遣騎馳奏

太宗命同吏部參政吉思哈率兵馳援至卽擊走之三年駐

守歸化城土默特部長以喀爾喀扎薩克圖屯兵近

地將犯城來告

太宗親統師往征與副都統吳巴海並從扎薩克圖引遁遂

還師吳巴海廝卒盜取軍糧坐徇隱革世職罷任尋

起工部參政時五爾喀諸蒙古皆隸版圖修職貢凡

通使及宴勞輒

命典其事順治元年卒官

吉林通志卷九十八

人物志二十七 國朝十二

車克

族子尙機圖

烏庫理

希爾根

子喀西泰

伊勒慎

子朗圖

路什

子布納海

巴山

子舒恕

碩詹

安達立

子阿積賴

那穆都魯坤

哈什屯

米思翰

敦拜

濟席哈

費雅思哈

子蘇丹

車克姓瓜爾佳氏居蘇完祖克爾業

太祖時來歸父席爾那任佐領隸滿洲鑲白旗旣卒車克仍  
其任兼前鋒侍衛

太宗賜姓覺羅氏天聰八年從征明大同趨懷遠薄左衛城  
與前鋒統領圖魯什等設伏敗其總兵曹文詔騎兵  
略地越代州五百餘里至五臺山遇總兵祖大弼兵  
二百餘擊走之並多斬獲崇德三年授戶部副理事  
官會承政韓大勳私取庫金事覺坐貯庫時冊檔失  
記論死

詔免死罰鍰仍留部用尋兼任參領五年鄭親王濟爾哈朗  
圍明錦州令與前鋒統領勞薩伏兵高橋坐縱敵弗  
擊籍家產半明年復赴鄭親王軍破明經略洪承疇  
步兵三營順治元年從入山海關擊敗流賊李自成  
明年以功予騎都尉世職四年考滿兼一雲騎尉明  
年擢本部侍郎隨英親王阿濟格討大同叛鎮姜瓖  
分兵援太原與巡撫祝世昌遣破劉遷萬鍊等瓖尋  
伏誅七年兼任正白旗副都統再遇

恩詔晉世職二等輕車都尉明年遷都察院參政駐防河間  
佐領碩爾對訃部臣給餉不均下法司鞫實由尙書  
巴哈納主議坐任侍郎時附和降世職爲雲騎尉其  
秋擢戶部尙書九年列議政大臣遇

恩詔晉世職騎都尉明年

世祖以前降世職處分過重復二等輕車都尉十一年以夙

矢忠勤任部務著績

特加太子太保明年擢秘書院大學士晉少保奉

命輯

太祖

太宗聖訓充總裁官十三年疏辭大學士弗允且

詔吏部曰戶部尙書職司國計必精敏練達之才方能勝任

大學士車克嚮任司農廉勤久著可晉少傅兼太子太傅

仍管戶部尙書事明年考滿加少師兼太子太師十六年

奉

命往江南督造戰艦明年同安南將軍羅託統兵征鄭成功

十八年

聖祖卽位

詔還京調吏部尙書先是有阿那庫者與兄金布爭產

詔均分阿那庫旋以金布隱匿婢女三訴戶部議以婢爲金

布所有於分產無涉置弗理阿那庫復與本旗佐領

吉詹爭論吉詹以違

旨妄爭牒戶部於是移牒刑部坐阿那庫違

旨罪論絞阿那庫妻擊登聞鼓訟冤



詔所司勘議阿那庫違

旨罪得釋車克應褫任罰鍰

詔削加銜免褫任康熙元年復授秘書院大學士六年以疾

乞休

詔原官致仕十年卒

賜祭葬如故事

子諡文端子渥爾敏襲餘子多通顯弟色格仕至都統尙機

圖則其族子也初以驍騎校駐防荊州從平盧溪縣

賊郭嘉等有功順治十六年從征福建鄭成功戰厦

門殉焉

卹贈雲騎尉弟羅多禮襲康熙十三年從征逆藩耿精忠至

江西戰建昌撫州兩府戰七星岡及戈陽縣戰浮潭

鋪並捷十六年隨鎮南將軍莽依圖自廣西征逆藩

吳三桂戰新村戰陶屯十九年隨征南大將軍賚塔

進雲南戰黃草壩亦並有功累授騎都尉世職

烏庫理姓扎庫塔氏先世居和克通吉父瑪爾圖當

太祖創業率百餘人來歸予騎都尉世職後隸滿洲鑲白旗

從征明錦州沒於陳烏庫理襲年十六卽宣力戎行

太宗命管參領事崇德三年隨貝勒岳託征明至山東其內

監馮永盛率兵迎戰敗之進攻濟陽縣攀堞先登所

部從之克其城師還借步軍統領薩穆什喀爲殿敵不敢逼道出太平寨步戰敗敵七年隨征明錦州戰於松山敵卻旋合兵據北山營壘甚固直前擊之三戰皆勝順治元年隨睿親王多爾袞入山海關敗流賊李自成追躡至望都再敗之秋隨都統葉臣趨山西攻太原府以十騎周視其城敵突出搏戰偕參領薩璧圖杭愛縱橫馳擊斬獲甚眾尋隨英親王阿濟格徇陝西湖廣江西班師至池洲擊敗黃斐兵獲其船十二還京任兵部理事官兼一雲騎尉三年隨肅親王豪格征流賊張獻忠於四川敗賊將高汝礪騎

兵獻忠收潰眾遁追之斬獲甚夥師旋賊復躡我後擊卻之五年從討大同叛鎮姜瓖圍甯武關僞巡撫姜輝僞總兵劉惟思合兵來援關內出兵應之率三旗護軍往來遮擊戰關下及偏關西河營七戰七捷進趨左衛賊兵萬餘陳以待旣擊破其眾薄城下用紅衣礮克之多所斬殪八年調工部理事官俄還兵部三遇

恩詔晉世職一等輕車都尉十年

命同理事官額赫理率禁旅並江甯杭州駐防兵赴福建時鄭成功據海澄於要隘列火器拒戰擊破之復斷橋

以拒躍馬絕河徑渡敵眾驚潰又以兵三千屯海岸  
進戰敗去先後與都統金礪及額赫理等招降數千  
人平其寨數十以功兼一雲騎尉十二年擢大理寺  
卿疏陳五事一言

國家定鼎以來滿洲士卒歲從征討所領月餉有定額  
而買馬置械一切軍裝皆所自備留京家口衣食維  
艱請

恩加賞賚一言兵燹所在民多流離目前雖奉

旨振貸將來作何安輯俾自爲生計乞

敕部速議便宜一言綠旗死事弁兵蒙

恩咸與贈卹請推廣

皇仁飭所司撫慰其妻孥量爲贍給一言江廣閩浙沿江濱

海盜賊出沒不常請

敕督撫卽其要區詳察機宜設重兵以資防剿一言我

朝中外一家邊遠番夷職貢之外仍通貿易而西北蒙

古若厄魯特俄羅斯諸部尙阻聲教請

敕理藩院大臣酌議互市條例以昭畫一並下部議行尋奉  
命往視黃河明年擢漕運總督時淮安連歲旱歉有司祈禱  
無應旣視事齋戒步詣壇所大雨立沛四郊霑足比  
返老稚歡呼爭至道左瞻頌之越三年考滿還京

賜鞍馬授

盛京總管康熙三年改總管爲將軍仍

命任焉疏陳所屬兵丁宜定更番直役之例以均勞逸

詔如所請先是

盛京設戶部禮部工部侍郎等官未設刑部而兵民獄

訟隸之總管疏請增設於是始設刑部侍郎一郎中

二員外郎六主事三年夏卒官軍民驚相告喪返

有哭送至山海關者

賜祭葬如典禮其世職二子分襲俄謀克圖襲三等輕車都

尉佛保襲騎都尉兼一雲騎尉烏庫理以忠義之裔

奮自早歲校其戰績諸將中故不乏也若夫言通治  
體政得民心則當時所僅見矣人各有能有不能豈  
不信哉

希爾根姓覺爾察氏世居長白山事

太宗藩邸任護衛隸滿洲正黃旗天命十一年蒙古巴林部

貝勒囊努克背盟劫掠大軍討之攻其寨囊努克擁

數騎遁希爾根追之馬蹶易馬突前敵騎皆靡

太宗遂射殪囊努克自是數從征伐有功予騎都尉世職崇

德元年擢護軍參領從證明我軍分克昌平寶坻順

義密雲東安文安定興安肅容城安州雄縣等邑以

護軍擊內監高起潛兵敗之擒總兵巢丕昌又偕都統譚泰設伏敗三屯營騎兵師還敵躡我後諸軍護輜重先行獨以軍殿論功超晉世職一等輕車都尉明年從克明皮島其秋

太宗行圍簡從行者父雅賴以佐領與焉啟睿親王多爾袞以已既從行乞免其父不許乃使告都統譚泰謂雅賴宜免以珠爾堪代之及獵

太宗以珠爾堪不應與選詰問侍衛索尼奏曰與選者雅賴希爾根給言已既從行故以珠爾堪代下法司坐欺罔應褫世職罷任得

旨從寬罰鍍蓋

太宗孝治天下爲重原其情而希爾根者亦可謂觀過知仁雖獲愆君子猶諒之五年隨睿親王圍明錦州我軍營山岡敵來攻擊走之復敗松山援兵師旋坐圍城時離伍及言事不實罰鍍黜功不敘七年隨大軍入明黃崖口進圍薊州其總兵白騰蛟來援迎戰破其軍斬馘無算

世祖定鼎燕京以功兼一雲騎尉順治二年隨英親王阿濟格追討流賊李自成由綏德州進圍延安府賊出攻鑲藍旗營擊卻其眾賊將一隻虎恃其勇屢擁眾來

犯三戰皆捷進至西安偕前鋒統領席特庫躡賊殲其二隊自成走湖廣追至安陸賊憑城以拒偕護軍統領鼇拜攻克之獲戰艦八十移師武昌擊敗劫我輜重之賊賊於江濱集舟數百將東下都統譚泰督軍往取獨先至獲之凱旋晉男爵世襲罔替明年隨肅親王豪格征流賊張獻忠與護軍統領哈甯阿阿爾津蘇拜等敗賊黨高汝礪武大定進擊獻忠於西充別趨涪州勦賊袁韜俘斬無算師還坐擊獻忠時哈甯阿被圍弗救與阿爾津蘇拜爭功論死得

旨從寬罰贖降男爵爲輕車都尉五年隨巽親王滿達海討

大同叛鎮姜瓖圍太谷礮破其城僞知縣李成沛都司吳汝器遁追斬之進克大同及長子縣渾源州朔州復招降府州縣各一偕都統漢岱攻克遼州山西平晉世職二等訴前降爵冤

詔授一等輕車都尉兼一雲騎尉三遇

恩詔晉爵一等男九年擢護軍統領明年與內大臣額爾克戴青等會奏佐領敦達禮岱敏互訐事下法司鞠訊削敦達禮世職罰鍰敦達禮訟冤

命覆勘得釋因論法司誤坐及會奏諸臣徧徇罪降爵三等男尋擢內大臣追論戰功復晉男爵一等康熙十二

年

聖祖念宣力有年

詔加太子太保明年

命爲定南將軍討逆藩耿精忠師次南昌而廣信建昌撫州已陷於是進軍撫州賊數出戰敗之擊走僞都督易明援兵賊棄城遁僞將軍陳昇結土賊郭應守等犯贛州令副都統甘度海參將塞勒等禦之陳斬僞總兵柯隆李梁逐北至龍泉縣破賊三營又攻取曹林十餘寨十四年擊僞將軍邵連登連敗之復建昌府移師饒州破滅餘干浮梁樂平諸邑賊眾先是

聖祖命安親王岳樂爲定遠平寇大將軍統師南昌簡親王喇布爲揚威大將軍統師江甯至是

詔安親王進征湖南奏言俟希爾根殲饒州廣信賊盡然後規取長沙

聖祖以逆渠吳三桂早滅則江西福建之賊不勦自平趣速進

詔簡親王率江甯兵二千赴南昌以希爾根爲副將軍協同鎮守明年三桂糾賊陷吉安據之偕簡親王督師攻圍十六年賊遁復其城

詔簡親王移鎮吉安希爾根仍駐南昌以年老

召還京十八年卒

賜祭葬如故事子喀西泰前殉疆場孫尙世特襲爵喀西泰  
當三桂初反以護軍參領隨前鋒統領穆占征四川  
賊將王屏藩營蟠龍山與戰方合他賊以水軍自江  
登岸分兵禦之縱橫兩陳閒所殺過當力竭而殞

卹贈雲騎尉尙世特兼襲之

伊勒慎

與姓富察氏者同名

姓費莫氏世居薩齊庫烏喇攻降

其部獨率所屬來歸後隸滿洲鑲黃旗兄曰古蘇

太祖征烏喇

命招降蜚悠城策穆特諸部烏喇惡之俘殺古蘇妻子

太祖閱焉子伊勒慎騎都尉世職尋從征明及戰沙嶺並有

功累晉世職二等輕車都尉天聰五年奉

命統兵鎮海州時明邊將窺瀋陽數縱士卒入遼河採捕旣  
之鎮嚴防禦密偵探率所部駕輕舟時出追截先後  
斬獲人戶及舟艦器械無算七年論功兼以從征明  
旅順口斬馘多晉世職一等崇德元年以守禦功晉  
男爵其秋明造巨艦百餘橫截遼河爲攻戰計與各  
守將烈渾寨薩等循河分立營壘別遣兵遷近邊居  
民仍率將士設伏河口執謀者以獻敵兵不能犯引  
遁四年以參政與刑部承政索海征瓦爾喀部陳獲



噶凌河疑阿字之誤及其黨二百有奇既而所監俘囚逃去博穆博果爾糾眾來攻先眾走索海等擊破賊眾又不邀擊其餘論死

詔褫世爵罷職鞭百籍其家六年坐防守海口時託言祭天則多魚苛斂軍士財物及私造浮圖等罪論死仍

詔鞭百八年起兵部參政復鎮海州順治元年既定鼎

命爲牛莊城守官明年卒年七十有九子朗圖以佐領從征黑龍江力戰沒於陳

卹贈騎都尉

路什姓納喇氏居章甲城父克恩

太祖時來歸後隸滿洲鑲黃旗崇德七年路什隨貝勒阿巴泰征明至山東攻兗州府先登克之

賜號巴圖魯予輕車都尉世職任參領順治元年隨睿親王多爾袞入山海關與佐領袞泰以步兵擊敗流賊李自成復與副都統阿哈尼堪追敗之望都明年隨英親王阿濟格追自成於陝西與副都統阿喇善敗賊綏德州進圍延安府自成兄子錦據城以拒我軍我軍七戰皆捷錦遁而自成為豫親王多鐸所敗棄西安南走商州遁入湖南英親王統大兵攝之至武昌賊巢在焉其黨劉宗敏拒戰偕前鋒統領蘇拜擊敗

其眾俘自成妻子累功晉世職二等三年肅親王豪格奉

命西征率兵以從叛鎮賀珍守雞頭關與護軍統領鼇拜力戰破之遂入四川與護軍統領希爾根擊流賊張獻忠敗之獻忠既滅分兵勦餘賊俘斬甚眾七年兩遇恩詔晉男爵十五年隨信郡王多尼征貴州明桂王朱由榔使其將羅大順拒戰與前鋒統領鄂納副都統噶禡哈分兵三路敗其眾十七年累功晉爵二等男世襲罔替康熙十七年隨貝勒尙善征逆藩吳三桂以所部扼岳陽湖之九馬嘴賊舟乘風來犯鏖戰久之力竭沒於陳事

聞

卹晉一等男兼一雲騎尉子布納海襲三十六年

聖祖親征噶爾丹隨撫遠大將軍費陽古由西路進戰昭莫多有功晉爵子尋以老乞休

巴山姓瓜爾佳氏世居哈達祖巴岱

太祖時率眾來歸任佐領後隸滿洲鑲黃旗再傳至巴山仍其任天聰五年從

太宗征明圍大凌河城明兵出戰副都統屯布祿殞焉怒馬陷陳奪其尸以還或告以佐領郎格等二人亦沒於

陳復入取其尸明年大兵征察哈爾其部眾有竄明大同邊境者往索之師還明兵來襲偕承政圖爾格殿後伏兵要擊斬馘甚眾以功予騎都尉世職任參領崇德元年從

太宗征朝鮮同參領屯泰等先眾破敵三年兼任工部理事官其秋隨貝勒岳託征明自牆子嶺入邊薄燕京擊其內監馮永盛兵敗之進攻矩鹿縣率所部以雲梯先登克其城論功兼一雲騎尉五年同承政薩穆什喀等征虎爾哈部攻掛喇爾屯有斬獲七年

命隨奉國將軍巴布泰率師駐防錦州順治元年隨睿親王多爾袞入山海關以所部步戰敗流賊李自成晉世職輕車都尉擢工部侍郎明年授鎮守江甯副都統三年

命總管江甯駐防滿洲兵時江北山寨未靖城中謀應之捕斬三十人未幾明潞安王朱誼石糾眾二萬分三路來犯與副都統康喀賚等破走之既而屯據攝山我軍進擊斬其渠數人餘潰明年明故官侯峒曾子侯元瀚遣謝堯文通明魯王朱以海於海島取其敕及黃斌卿致招撫大學士洪承疇書以歸爲柘林遊擊陳可所獲內有屬承疇斬巴張二將語謂巴山與提

督張大猷也事

聞

世祖以所云乃反聞

特詔慰承疇而

獎巴山大猷日卿等嚴察亂萌具見公忠盡職六年總督馬

國柱勦六安州山寨以兵會之陳斬其渠張福寰餘

寨悉平明年再遇

恩詔晉男爵九年還京十一年以久鎮江甯平賊寇有功晉

男爵二等康熙十二年卒

賜祭葬如故事子舒恕襲十五年隨大學士圖海討叛鎮于

輔臣師至平涼北城虎山墩輔臣以眾萬餘來拒擊  
敗之尋隨都統穆占征逆藩吳三桂破賊眾三千於  
湖北松滋縣進圍雲南敗賊將胡國柄劉圮龍黃明  
等又蹙賊將馬寶巴養元等於烏木山二十五年論  
功晉一等男以年老乞休尋卒

碩詹姓富察氏世居訥殷父舒穆祿

太祖時來歸授佐領後隸滿洲正紅旗既卒碩詹繼其任尋  
兼參領天聰五年同參領杭什木沙爾虎達等略明  
邊境有斬獲八年子騎都尉世職崇德元年

太宗親征朝鮮克其國都國王李倬遁保南漢城其妻子在

覺華島分兵取之乘船渡海越朝鮮戰艦而過偕佐領阿哈尼堪率先登岸攻圍降其城論功兼一雲騎尉三年兼任刑部理事官其秋隨貝勒岳託征明由牆子嶺毀邊牆入越燕京略山東攻禹城平陰二縣克之明年春師旋旣出邊敵來追襲偕巴圖魯尼哈里擊卻之晉世職輕車都尉秋舉本旗都統都類征山東時索賄於降城又於濟南府發明德藩埋藏珍玩悉私之下法司鞫實都類褫職藉家產入官資碩詹以其半尋擢戶部參政五年大軍征明錦州命赴朝鮮徵其水師及糧由旅順口會大凌河稱

旨其秋隨大軍圍錦州參領禧福以甲士二十四人駐駱駝山敵以步騎四百夜往將覆之間警馳援與禧福斬級二百餘獲馬十六七年管正紅旗滿洲副都統事順治元年隨睿親王多爾袞入山海關擊敗流賊李自成定燕京改參政曰侍郎仍任戶部秋八月

世祖遷都燕京

命統右翼兵留守

盛京冬隨豫親王多鐸由河南征陝西明年擊自成賊眾敗之連破其營克潼關進取西安尋移師江南累功晉世職一等四年考滿兼一雲騎尉明年隨鄭親

王濟爾哈朗征湖南時衡州府爲明桂王朱由榔總兵陶養用所據六年偕都統佟圖賴伊拜等自湘潭進距城三十里敵據橋立寨督兵擊敗之奪其寨斬養用遂定衡州明年凱旋

賜銀三百兩兩遇

恩詔晉爵一等男八年駐防河間佐領碩爾對訟戶部給餉不均部臣並降黜坐降一等輕車都尉復遇

恩詔兼一雲騎尉明年以老病罷侍郎及副都統任十年世祖以前因給餉事處分過重仍復一等男爵康熙二年卒年六十有四

賜祭葬如故事諡曰明敏孫達色法色分襲其爵並授二等輕車都尉而達色以參領從征福建援海澄死之志於天聰崇德時人例傳二世故達色事不得詳

安達立姓納喇氏世居葉赫隸滿洲正白旗嘗擊降明蒙古於鐵嶺有功天聰初隨貝勒薩哈璘駐防牛莊蒙古有叛逃者追斬之大軍攻明永平副都統葉臣以二十四人冒礮石先登安達立與焉

賜緞匹牲畜尋偕參領圖魯什偵敵建昌夜與敵遇力戰我軍有中矢墜馬者援之出旃擢前鋒參領從大軍入明邊攻崞縣率所部先登尋以四十人伏忻口擊敵

騎二百擒六人獲馬五十餘擐三纛及出邊都統圖爾格敗敵追兵安達立復邀擊之所殪甚眾予騎都尉世職崇德元年擢本旗蒙古副都統其冬隨貝勒岳託證明議入牆子嶺敵守隘口甚固同都統恩格圖率所部別趨嶺右陟高峯入邊敵騎七千迎戰先眾馳擊斬級無算遂越燕京略山東明年春師旋由青山口出邊擊敗敵眾追躡者克山巔一臺五年隨大軍圍明錦州敵自松山杏山來犯連戰皆捷明年復圍錦州其經略洪承疇集兵赴援破其三營俄敵至自塔山奪其挨牌鏖戰至日暮敵潰走翼日敵自

松山犯我右翼營復擊卻之七年兼一雲騎尉尋卒年六十有三子阿積賴襲順治元年以護軍參領從入關擊敗流賊李自成追敗之望都復隨都統葉臣擊賊黨於懷慶勝之進攻太原數挫拒戰賊眾又分兵敗賊黃河渡口署本旗蒙古副都統隨英親王阿濟格攻延安賊出劫輜重擊走之追擊自成於武昌連破賊壘自成竄九宮山躡剿之殪其黨甚眾論功晉世職輕車都尉四年兼任刑部理事官明年署護軍統領隨鄭親王濟爾哈朗征湖南分兵徇道州明桂王朱由榔以其眾據永安關進破其柵壘眾潰走

獲馬二十餘七年凱旋

賜白金三遇

恩詔晉世職一等兼一雲騎尉十二年卒子海都襲

那穆都魯坤那穆都魯其氏坤其名也先世居綏芬

父伊納克當

太宗征瓦爾喀先眾迎降隸滿洲正黃旗天聰八年予雲騎

尉世職尋卒坤襲焉洊擢一等侍衛兼管佐領事崇

德六年從征明錦州其總兵曹變蛟乘夜犯

御蹕突正黃旗營門諸侍衛及親軍散列門左右坤獨中門

而戰甚力敵卻去

太宗嘉之

賜號巴圖魯

賚銀四百兩超晉世職一等輕車都尉順治二年甄錄

太宗眷顧舊臣各予世職坤兼一雲騎尉數遇

恩詔晉爵一等男兼一雲騎尉十年以奉遣祭

昭陵辭不往扈

蹕南臺不入直又擅取

賜配有屬之女爲妻下內大臣鼐拜等議罪應死籍沒

詔從寬罷任留一等男爵尋復一等侍衛十一年隨靖南將

軍珠嗎喇征廣東署部統事時明桂王朱由榔遣其



晉王李定國自廣西犯廣東據新會縣山峪與諸軍合擊大破之追戰橫州江岸斬殪無算以功加一雲騎尉十五年授散秩大臣尋擢內大臣康熙十二年詔獎勵舊大臣加太子太保是冬逆藩吳三桂反明年聖祖以河南地廣兵少恐有乘間竊發者

命爲振武將軍率兵駐防汝甯旣而陝西提督王輔臣叛據秦州

詔移兵西安十四年

詔同副都統翁愛等進守漢中先是貝勒洞鄂由漢中進勦保甯聞輔臣反還西安令將軍席卜臣以兵守漢中

及輔臣毀鳳縣偏橋阻我糧運又截棧道斷漢中聲援坤以疏

聞

詔趣開棧道援漢中師次寶雞道阻不得進

詔罷將軍以內大臣留貝勒洞鄂軍大軍復秦州坤同將軍佛尼埒追勦賊眾連戰皆勝復禮縣清水伏羌等城時席卜臣以漢中乏餉乘間還西安十七年

詔趣大軍規復漢中以坤與副都統馬一豹等守潼關明年以年老

召還京二十二年議政大臣追論奉

命援漢中頓兵不進雖有勞勩未足以抵應罷黜官爵並削  
巴圖魯號

聖祖曰巴圖魯號

太宗文皇帝所賜其勿削並留一等輕車都尉世職二十四  
年

聖祖念坤宣力有年雖獲罪軍中事非由己起授散秩大臣  
詔年已衰邁如不能入朝聽其家居二十六年卒  
賜祭葬如例孫顯圖襲

哈什屯姓富察氏世居沙濟城祖旺吉努

太祖時率屬來歸授佐領後隸滿洲鑲黃旗既卒子萬濟哈

襲管佐領哈什屯其長子也初任前鋒校天聰時授  
侍衛尋襲管佐領擢禮部參政崇德二年同佐領喀  
愷率兵分道征瓦爾喀俘獲甚眾明年

太宗親征喀爾喀部留守

盛京禮親王代善聞明總兵沈志祥欲以石城島兵眾  
歸附遣招之志祥遂降是年重定官制改禮部副理  
事官六年大軍圍明錦州其總兵曹變蛟夜犯

御營先眾出禦腕為敵槍所傷裹創戰愈厲卒以卻敵

賜白金及蒙古人戶順治元年擢內大臣明年以勞勩久著

予騎都尉世職考滿兼遇

恩詔晉世職一等輕車都尉兼一雲騎尉七年列議政大臣  
秋睿親王多爾袞疾偕貝子錫翰等往視睿親王曰  
子有疾

上宜臨視尋曰毋以子言奏既而

駕臨視之睿親王罪大臣等違令妄請降世職爲騎都尉八

年

世祖親政知其無罪

命復世職如故兩遇

恩詔晉爵一等男初冷僧機諂附睿親王及誣兩黃旗大臣  
謀立肅親王豪格事具博爾輝傳肅親王爲睿親王

所害鞏阿岱與何洛會議並殺其子富綬事具巴哈  
傳至是

世祖正冷僧機等罪哈什屯並質之冷僧機等伏誅鄭芝龍  
之降其子成功猶居海上爲福建患奉

命同內大臣遏必隆鼇拜大學士范文程宣

諭芝龍書招之芝龍遣人往福建取其妻妾及幼子至京十

年以宣力有年兼一雲騎尉十二年

詔獎奉職恪勤諸大臣加太子太保明年奉

敕使朝鮮鞫獄稱

旨尋以年老致仕康熙二年卒年六十有六

賜祭葬如故事諡恪僖子米思翰襲自有傳乾隆元年孫大學士馬齊疏陳其功得

旨入祀賢良祠十三年

冊諡

孝賢皇后

推恩先世追封一等公明年曾孫大學士傅恆經略金川功

成凱旋

詔視勲臣額亦都佟國維例

賜建宗祠春秋致祭以獎忠勲祀自哈什屯始

米思翰康熙三年由侍衛襲父哈什屯一等男兼一

雲騎尉管佐領事六年任內務府總管輔政大臣有欲假尙方器物者輒嚴拒之不以予

太祖親政知其守正不阿授禮部侍郎八年擢戶部尙書尋列議政大臣先是行省歲賦聽布政使存留司庫每有移虧之弊疏請通飭各省自俸餉諸經費所餘悉解部由是勾稽出入瞭如指掌當是時天下甯一而尙可喜鎮廣東耿精忠鎮福建藩屬將弁惰游驕縱吳三桂鎮雲南要請無已縱恣尤甚十二年可喜請撤藩歸老遼東三桂精忠亦以請特嘗

朝廷非其實也疏下戶兵二部議米思翰與兵部尙書

明珠等議令俱撤移駐山海關外廷臣有言三桂不可撤者以兩議入奏得

旨如米思翰議既而三桂反

聖祖命王貝勒率八旗兵征討議者謂軍需浩繁宜就近調兵守禦獨言賊勢猖獗非綠旗兵所能制宜以八旗勁旅會剿軍需內外協濟足支十年可無他慮於是請以內府所儲分年發給復綜各省庫金倉粟以時撥運並稱

旨明年偕戶部諸臣疏言大軍勦賊屢奉

明詔以正賦給軍需恐有司尙借端私派請

敕各督撫嚴察所屬凡供應糧餉薪芻一切用官帑毋許苛派其購自民間者準時價支給勿纖毫累民奉

旨如議速行是年冬卒年四十有三

聖祖軫惜特至

賜祭葬如故事諡敏果方三藩之變時以議撤者速之而代爲之危

聖祖語廷臣曰朕自少時以三藩勢焰日熾不可不撤豈以其反委過於人耶及藩孽殄平

聖祖追憶持議之臣

稱米思翰不置子四第四子李榮保襲乾隆元年次子馬齊

疏陳勞勩

詔入祀賢良祠十三年

冊諡

孝賢皇后

推恩所生暨李榮保並追封一等公明年李榮保子傅恆以

功

賜建宗祠而哈什屯米思翰李榮保三世並入祀云

敦拜姓富察氏世居沙濟城於議政大臣哈什屯蓋

族人不知其遠近矣父本科理

太祖時來歸有朱舍理部長尤額楞者不賓

命同鄂佛洛總管達賴征之有功

賜號蘇赫巴圖魯管佐領事隸滿洲正黃旗尋卒子三人敦

拜其長也天命十一年以佐領從征明甯遠先驅偵

敵敗城中迎戰者師旋遇敵步戰殲二十人敵復以

騎來追殿後擊卻之天聰八年

太宗以克副任使予騎都尉世職崇德五年擢護軍統領隨

鄭親王濟爾哈朗圍明錦州敵兵出犯突入其陳斬

三人餘驚遁既而杏山敵騎一再來援並戰卻之明

年復圍錦州明經略洪承疇自松山遣兵犯我兩紅

旗營率所部禦之卻去尋犯我蒙古營馳援之斬級

二百餘獲雲梯十四以功兼一雲騎尉八年同護軍  
統領阿濟格尼堪駐防錦州順治元年從入山海關  
擊敗流賊李自成追敗之望都晉世職二等輕車都  
尉先是自成走西安明福王朱由崧自立於江南二  
年豫親王多鐸奉

命征江南取道河南先除自成賊黨敦拜率護軍以從師至  
陝州賊將劉方亮以兵千餘來犯同護軍統領圖賴  
阿濟格尼堪擊敗之其夜復襲我營力戰以禦大捷  
遂破潼關進攻西安自成由商州遁湖廣同護軍統  
領阿爾津等追斬三百餘人移師江南破揚州趨江

甯由崧聞大軍至走蕪湖追之明將黃得功迎戰中  
流矢死由崧爲其總兵田雄等執以獻晉世職一等  
明年隨端重親王博洛征福建有功五年隨征南大  
將軍譚泰討江西叛鎮金聲桓賊黨據九江先驅至  
城下敗其眾聲桓與其黨王得仁糾步騎七萬自南  
昌迎戰合大軍力擊敗之招撫府一縣四明年奉

命勦畿南土賊斬賊渠十數任邱獻縣雄縣寶坻諸邑悉平  
七年論西安福建江西功晉男爵尋隨睿親王多爾  
袞獵中後所以偕都統噶達渾等私行射生降一等  
輕車都尉明年

世祖親政復爵如故九年遇

恩詔晉爵二等男十一年明桂王朱由榔遣其晉王李定國

自廣西犯廣東

命副靖南將軍珠瑪喇征之定國立寨新會縣山峪平南王  
尙可喜先以兵防禦未及戰偕珠瑪喇合兵以進敗  
定國之眾追至橫州江岸多所斬獲復所陷郡邑凱  
旋以功晉爵二等子得

旨從優再議晉一等會有疾乞休加太子太保以原官致仕

十四年起

盛京總管十七年卒

賜祭葬如故事諡襄壯無子以從孫瑚錫布襲弟曰濟席哈

曰費雅思哈並有傳

濟席哈亦曰季什哈初任佐領崇德四年擢護軍統  
領明年隨鄭親王濟爾哈朗征明錦州敵兵自松山  
來邀偕參領布丹希爾根囊古等擊卻之尋以兵駐  
義山衛屯田者

太宗戒諸將勿浪戰惟固守營壘敵逼乃禦之旣而敵猝犯  
鑲藍旗營越鑲紅旗營助戰坐擅離所守罷護軍統  
領籍產三之一尋奉

命同副都統席特庫率護軍及外藩蒙古兵征索倫部擒部



長博穆博果爾並其家屬人眾牲畜六年凱旋

遣官迎於北驛館

賜宴勞之復隨鄭親王圍錦州數敗松山援兵明年授正紅旗蒙古副都統八年兼任戶部參政順治元年大兵入山海關偕都統恩格圖擊敗流賊李自成追敗之望都子騎都尉世職明年隨端重親王博洛征浙江既下杭州以副都統駐守時明福王朱由崧已滅其大學士馬士英總兵方國安以眾二萬餘據嚴州數來犯督兵禦之五戰皆捷尋還京任工部侍郎四年考滿兼一雲騎尉明年

命率兵駐防東昌府旋以鄭彩擾福建移兵隨靖南將軍陳

泰征之彩眾據長樂連江同安平和等縣連攻克之

論功晉世職二等輕車都尉七年調刑部侍郎尋遷

尙書兩遇

恩詔晉男爵九年授正紅旗蒙古都統仍兼刑部尙書列議

政大臣明年膠州總兵海時行反

命爲征東將軍與副都統瑚沙率兵往勦師未至時行奔宿

州漕運總督沈文奎山東總督馬光輝合兵擊之時

行窮蹙降旋伏誅

詔移兵鎮守湖南明年

召遣署刑部尙書尋

命專管都統事十四年調滿洲都統其冬

命率副都統四護軍參領八赴甯南大將軍宗室羅託軍征

明桂王朱由榔明年大軍三路並進

世祖以征南將軍卓布泰自廣西進貴州者兵少

詔率將士助之進次都勻連敗其晉王李定國兵遂令湖南

四川兩路兵進克雲南由榔走緬甸

賜蟒服鞍馬以勘鞫隨征將士功罪不實降爵爲一等輕車

都尉世職黜功不敘十六年山東土賊于七作亂據

棲霞縣距嶗山出掠郡邑

聖祖命爲靖東將軍率兵討之進圍其寨斬殪無算于七竄

入海賊平康熙元年班師其秋卒

賜祭葬如故事子阿祿襲厯官西安副都統六十年疏爲父

請諡

允之追諡勇壯

費雅思哈天聰崇德間屢立戰功順治元年隨睿親

王多爾袞入山海關擊流賊李自成敗之又追敗之

望都游擢護軍參領隨英親王阿濟格追勦自成由

口外入邊師次榆林賊黨逆戰破其眾進至延安賊

以夜突圍走偕都統噶達渾截擊敗之明年躡賊入

湖廣於安陸荊州武昌三戰皆捷進至九江敗賊眾  
獲其船三十冬隨定西大將軍何洛會征流賊於四  
川偕噶達渾擊敗賊渠胡敬德兵千餘進至漢中連  
敗郭延德何進諸賊是年論入關功予騎都尉世職  
三年隨肅親王豪格征流賊張獻忠賊兵犯鑲藍旗  
營偕噶達渾及護軍參領希爾根往援破其眾賊堅  
守遵義府以拒與諸將攻克之兼一雲騎尉六年從  
征大同叛鎮姜瓖遇賊黨楊晉衛三戰皆勝又再敗  
賊眾於太原等處分兵趨汾州賊勝夜來襲擊卻之  
十三年擢護軍統領尋列議政大臣十七年同定西

將軍愛星阿征明桂王朱由榔擊敗其晉王李定國  
兵康熙元年復同追其鞏昌王白文選入緬甸執由  
榔以獻論功晉男爵尋卒

賜祭葬如故事諡恪僖子蘇丹襲二十九年從征噶爾丹中  
流矢明年奉

命至甯夏阿拉善山搜剿噶爾丹賊黨獲其濟農一  
賜衣一襲及弓矢等物以創發乞休子蘇圖襲雍正元年創  
愈起右翼前鋒統領尋擢本旗蒙古都統羅卜藏丹  
津亂青海以參贊大臣赴軍討之青海平復予輕車  
都尉世職異數也調滿洲都統列議政大臣

特賜鞍馬五年以年七十

賜銀千兩及冠服寵異之七年卒

賜祭葬如例諡勤僖費雅思哈與敦拜濟席哈兄弟三人並

為

國爪牙比功較績當時故多有而生僭顯爵沒膺榮諡

又並終於牖下斯則所無也豈以其父本科里有功

早卒故特食其報歟何其盛歟

吉林通志卷九十九

人物志二十八

國朝十三

喀喀木

布克沙

子貴復

圖喇

瓦爾喀

族人額德蘇什  
布吳孫族子

胡錫

孫岱

朱希奇

佛尼埒

額棱特

察哈泰

兄穆爾泰

擴爾坤

野里渾

諸父阿福尼弟  
洛多權 腔古圖

族人穆魯

賚圖庫

褚庫

興鼐

猶子黨愛

克宜福

子喀齊蘭

噶達渾

達理善

達都

和託

喀喀木姓薩哈爾察氏先世居烏喇部父唐阿禮

太祖時率百人來歸授佐領使轄之後隸滿洲鑲黃旗從征遼東有功予輕車都尉世職天聰八年從征瓦爾喀傷於熊以卒喀喀木襲崇德三年授吏部理事官五年隨承政索海征虎爾哈部力戰破其柵斬級二百擒索倫兵百三十人以歸七年隨征明松山坐本旗將領失律未察舉降世職爲騎都尉八年擢參政順治元年署副都統從入山海關督後隊擊敗流賊李

自成兼一雲騎尉時改參政爲侍郎仍任吏部四年考滿復輕車都尉世職奉

命率師征鄖陽初大兵定湖廣鄖陽總兵王光恩迎降予原官留鎮至是以罪繫其弟光泰糾眾叛據鄖陽稱明鎮武伯連結叛黨賀珍武大定等爲援提督孫定遼戰沒賊勢頗熾師至偕副將王平素渡河轉戰至房縣斬級千餘光恩及僞總兵李世英等竄四川明年叛鎮金聲桓自江西窺湖廣留防荊州六年還京明年兼任本旗副都統三遇

恩詔晉男爵先是鄂爾多斯部札穆素多爾濟屯牧神木邊

外害我使臣叛去旣而札穆素悔罪來歸多爾濟竄匿賀蘭山數犯邊界肆劫掠八年秋奉

命同都統噶達渾等討之明年春自甯夏出水驛口至賀蘭山後分兵搜剿斬多爾濟及其弟二人悉殲部眾俘幼弱及婦女並馬駝各數百牛千餘羊萬以歸夏授鎮守江甯總管十年

命爲靖南將軍移師廣東時李定國自廣西掠廣東潮州總兵郝尙久應之師至同靖南王耿繼茂進圍潮州克之尙久投井死潮州及附近州縣悉平還駐江甯十六年鄭成功陷鎮江據瓜州犯江甯與總督耶廷佐

提督管效忠禦之檄蘇松總兵梁化鳳等赴援會貴州凱旋師東下要與協守議以敵勢盛宜乘其未集先擊之簡兵出戰敗其初至者獲舟二十餘已而成功悉兵薄城連營八十有三舳艫蔽江我援師旣集化鳳效忠先以綠旗兵分出儀鳳鍾阜二門夾擊所殪甚眾陳獲其總統余新及總兵二敵氣奪次日乃與貴州還師噶褚哈瑪爾賽出神策門敵據山列陳分左右翼仰攻而自率精銳擣其中堅擒其提督甘輝及總兵數人斬馘無算成功收潰眾遁我水師邀擊之淹斃過半獲船五百餘而鎮江瓜州所屯亦遁

事

聞下部優敘尋部議陷鎮江瓜州罪

世祖以固守江甯功可抵

特旨免議康熙元年改江甯總管爲將軍仍以任之七年卒

子喇揚阿以例降襲一等輕車都尉兼一雲騎尉

布克沙姓瓜爾佳氏世居哈達隸滿洲鑲黃旗嘗以

護軍校駐防牛莊偵明兵所在因擊敗之崇德二年

從征明皮島乘舟偕參領鼇拜先登被

優賚擢護軍參領五年大軍圍明錦州刈其田禾敵出護以

十騎截擊敗之復擊卻杏山松山援兵又同都統圖

爾格等設伏敗敵追擊至河濱奪其羸獲馬十餘旣

而圖爾格與葉克舒戰敵方酣自右翼橫擊之連勝

敵明年復圍錦州明經略洪承疇遣騎自杏山來犯

戰卻之進破其步兵三營七年隨貝勒阿巴泰征明

擊其總兵馬科於渾河岸敗之又擊走別將以三千

人守渡口者遂趨山東略萊州攻克蒙陰沂水二縣

明年凱旋累功授騎都尉世職

賜銀幣順治二年隨英親王阿濟格征流賊李自成自成走

湖廣躡擊之連敗賊眾於安陸武昌復同都統都類

逐北至九江富池口多獲賊船會奉

詔班師徑池州擊走明總兵黃蜚部眾獲船十有二明年隨  
豫親王多鐸征蘇尼特部騰機思偵布爾噶山有賊  
隨貝勒博和託掩之斬二十餘人又擊敗土謝圖汗  
及碩顏各汗兵以功並三遇

恩詔晉世職一等輕車都尉九年擢本旗蒙古副都統尋兼  
戶部侍郎明年以疾乞解任十四年卒子哈楚罕襲  
貴復其第三子也任侍衛兼佐領順治十六年雲南  
既定元江土司那嵩復叛從大軍討平之康熙十四  
年隨安親王岳樂征逆藩耿精忠師次江西敗賊符  
潭浦賊將李茂珠以萬餘人據建昌府南鐘鼓山力  
戰被創尋以創發卒於軍

卹贈雲騎尉世職

圖喇姓舒穆祿氏琿春人隸滿洲正黃旗初任兵部  
筆帖式崇德七年隨饒餘貝勒阿巴泰征明山東攻  
泗水縣流矢中目戰愈厲進攻新泰諸縣仍爲諸軍  
先順治元年隨豫親王多鐸征陝西明年移師江南  
擢兵部主事七年積功兼兩遇

恩詔予騎都尉世職尋擢郎中十三年隨甯海大將軍伊爾  
德征浙江舟山明魯王朱以海故將阮思以巨艦百  
餘拒戰偕副都統根特擊敗之思復糾陳六御張洪



德等合兵三萬餘來犯偕副都統柯永秦連破其眾  
舟山平手足並傷於礮以功兼一雲騎尉十八年山  
東土賊于七倡亂

聖祖命同郎中察奇至棲霞分別賊黨時于七據岨嵎山其  
黨段忠續林萬鵬龐應奎高起英各擁眾數千分據  
鼇山潛結棲霞城中爲內應獲其謀二人賊情悉得  
會靖東將軍濟席哈率師抵萊陽遣使相聞疾調綠  
旗兵七百馳至獲城中從賊者三百餘人進趨鼇山  
忠續等望風遁多所俘獲還京擢大理寺少卿康熙  
二年授駐防杭州副都統其冬與總督趙廷臣至定

海招降鄭錦之靜波將軍阮美及屬官百二十餘兵  
三千七年擢杭州將軍十三年逆藩耿精忠叛

詔與總督李之芳提督塞白理相機禦之旋以都統賚塔爲  
平南將軍赴衢州禦賊

命圖喇守杭州兼防海疆疏言兵少

詔移江南綠旗兵五千駐杭州又疏請杭州增設防禦每旗  
各一員下部議從之尋以疾還京卒

賜祭葬如故事子明德襲

瓦爾喀世居完顏卽以爲氏隸滿洲鑲紅旗初任前  
鋒校每臨陳爲諸軍先中創不退被

優賞屢矣崇德三年隨貝勒岳託入自牆子嶺越燕京趨山東攻海豐克之七年隨饒餘貝勒入自黃崖口轉戰至山東攻范縣攻具未至眾俟之以長槍破城垣爲磴先登克其城順治三年隨肅親王豪格征四川擊敗流賊張獻忠手殪二十餘人擒哨騎十我軍有阿納海者爲賊所圍攢刃幾及縱馬突入格殺二人援以出五年隨副都統烏拉禪駐防大名攻勦土賊於祁州及臨洺關積功並三遇

恩詔授輕車都尉世職九年擢工部理事官十三年董修

乾清宮成十五年

奉先殿成游晉世職一等明年署前鋒參領隨都統卓羅等駐防雲南元江土司那嵩旣降復叛督軍以雲梯攻下其城康熙元年還京卽眞兼督捕理事官五年擢西安副都統七年擢將軍十二年吳三桂反

命偕副都統佛尼埒率西安軍馳赴四川扼險要明年

聖祖聞四川巡撫羅森提督鄭蛟麟總兵譚洪吳之茂等並

反應三桂

詔瓦爾喀暨佛尼埒日卿等久歷戎行諳練軍事朕可無西顧之憂大軍入蜀後吳逆所屬有來降附者宜密爲防閑至綠旗陷逆官兵相機招撫便宜行之師次漢中聞譚洪

據陽平關及野狐嶺四十餘里並有賊黨據隘以守  
部署諸將分三路擊之野狐嶺賊潰並殲伏賊無遺  
乘勝疾趨陽平關克之摧鋒而前七盤關朝天關皆  
下先後殪賊萬數獲旂幟器械無算

聖祖嘉其功

命事平優敘時賊堅據保甯我軍距城十里鑿壕塹與相持  
久之其秋卒於軍

賜祭葬如故事諡襄敏於墓道立碑十六年追論征保甯不  
乘賊未設備疾進又不分兵扼要地致賊劫掠戕我  
兵眾奏報不以實

聞應黜原官及世職追奪飾終典禮籍沒其家

詔免籍沒額德者其族人也天聰七年以驍騎校從征明旅

順口乘船先登與敵戰城下矢盡短兵接沒於陳

卹贈雲騎尉世職子赫爾素襲順治七年九年三遇

恩詔晉世職輕車都尉赫爾素子舍爾圖康熙二十年亦於  
雲南戰沒例不得詳蘇布什吳孫亦並瓦爾喀族人  
蘇布什順治元年從入山海關以功予雲騎尉世職  
七年遇

恩詔晉世職騎都尉卒子懇赤襲順治五年從征江西叛鎮  
金聲桓十一年從征廣東李定國並有功兼遇

恩詔晉世職輕車都尉吳孫順治二年以前鋒參領隨豫親王多鐸追流賊李自成至潼關連破賊營明年隨討叛酋騰機思並敗土謝圖汗兵累功兼三遇

恩詔授輕車都尉世職而瓦爾喀族子日胡錫日孫岱日朱希奇胡錫順治十八年以驍騎校從征山東土賊有功康熙十三年隨定西將軍希爾根征逆藩耿精忠戰新城及萍鄉隨安親王岳樂征逆藩吳三桂戰長沙並有功俄以攻城戰沒

卹贈騎都尉世職兼論前後戰功也孫岱初以佐領從征雲南廣東並有功康熙十三年從征逆藩吳三桂戰四

川盤龍山龍潭驛等處皆捷十五年從征叛鎮王輔臣於秦州北山鹽關牡丹園數敗賊累功授騎都尉世職歷官王府長史朱希奇天聰八年任佐領以材予騎都尉世職從征察哈爾及朝鮮明錦州松山杏山山東至入山海關並有戰功順治三年隨豫親王多鐸討叛酋騰機思擊敗土謝圖汗等兵多所俘獲洊擢至

盛京副都統三遇

恩詔晉世職一等輕車都尉兼一雲騎尉西安副都統佛尼埒繼瓦爾喀爲將軍自有傳

佛尼埒姓科奇理氏世居瓦爾喀父索勒和諾少孤其兄瑚里納撫之成立爲仇所害索勒和諾手刃其仇祭兄墓遂來歸

太宗隸滿洲鑲紅旗崇德七年以驍騎校隨饒餘貝勒阿巴泰征明攻河間府先登戰沒

卹贈雲騎尉世職佛尼埒襲從入山海關任西安駐防佐領順治元年流賊李自成餘黨竄陝西湖北山中數隨大軍勦之署營總尋擢協領再遇

恩詔晉世職至二等輕車都尉康熙八年擢西安副都統十三年四川巡撫羅森提督鄭蛟麟總兵譚洪吳之茂

### 等叛應逆藩吳三桂

命同西安將軍瓦爾喀進討師發漢中連克平陽七盤朝天三關賊守保甯事具瓦爾喀傳明年代瓦爾喀加振武將軍銜隨貝勒洞鄂討叛鎮王輔臣於秦州賊將以眾四千立寨關山河岸以拒偕前鋒統領穆占進戰閱兩時許斬獲甚眾遂破其寨逐北渭河橋薄秦州賊以壁壘未立輕騎出犯遮擊之因克西二關賊俟夜復出逆殪甚夥旣而以眾數千出掠仙逸關冀相牽制分兵援勦賊聞之卽踰山遁躡擊略盡留參領嵩祝守關而自率兵趨隴州四川合平涼賊萬餘

援秦州城賊亦近萬將夾擊城下大軍卽還自隴州  
反與大軍夾擊焉擒斬僞總兵李國棟胡茂白光永  
王元殪賊三千遂復秦州下禮縣西河清水伏羌諸  
邑尋奉

命以兵開棧道援將軍錫卜臣於漢中賊拒長甯驛滴水崖  
等處連擊潰之招撫陷賊各村寨十五年春吳之茂  
糾賊萬餘犯秦州僭提督王進寶禦之斬二千餘級  
擒僞總兵徐大仁獲輜重無算邀賊糧運於鹽關焚  
之獲馬贏甚夥敗僞總兵李國良等於清水縣復靜  
甯州復擊吳之茂於牡丹園之茂走西河北山追擊

之以十餘騎遁去明年追論前自保甯退歸諸將罪  
降世職爲騎都尉削振武將軍銜仍署西安將軍事  
十七年僭副都統吳丹等連敗賊眾於牛頭山香泉  
等處進駐寶雞防棧道擊卻賊窺益門鎮者明年隨  
撫遠大將軍圖海取興安先驅至火神崖擊走僞總  
兵王遇隆渡乾玉河拔梁河關遂復興安十九年僭  
總兵王朝海招降潼州府及鹽亭中江射洪諸縣尋  
敗賊豹子山賊渡江遁復瀘州冬逆孽吳世璠遣其  
黨胡國柱入敘州陷永甯

詔授建威將軍勦之明年春賊眾二萬犯寶壩大溪口迎擊

敗之乘勝復馬湖府賊將宋國輔陸道清等詣軍門  
獻永甯府以降國柱棄敘州遁奉

命駐敘州尋

命統西安滿洲兵之征四川者還鎮漢中二十一年卒雍正  
十年入祀賢良祠乾隆元年追諡恭靖第三子託疏  
襲歷官黑龍江將軍次子額棱特自有傳  
額棱特既喪父四川總督哈占奏言貧不能還京請  
留西安效用下部議駁

詔自賊擾四川佛尼埒勤勞王事

特許之康熙二十三年補西安駐防佐領三十年厄魯特巴

圖爾額爾克濟農劫掠喀爾喀札薩克丹津部眾

聖祖遣將軍尼雅翰往宣

詔旨使還所掠人畜率部眾徙居察哈爾地巴圖爾額爾克  
濟農不從以其眾遠竄額棱特隨大軍追之不及擒  
蒙古二人復隨將軍郎坦出嘉峪關追擒蒙古七人  
三十五年

聖祖親征噶爾丹隨撫遠大將軍費揚古自西路進大敗賊  
眾於昭莫多予雲騎尉世職擢協領四十二年

駕幸西安

閱武設宴

特召近

御座前

親賜之飲曰爾父宣力亦由戎行至協領故親賜酒以示寵

異尋擢西安副都統調荊州四十九年

特授湖廣提督

念其奉職清貧

詔湖廣總督巡撫量爲資助五十二年川陝總督殷泰以疾

乞解任

聖祖念其廉潔自持令在任調治久之未愈乃以湖廣總督

鄂海調補川陝授額棱特爲湖廣總督

詔大學士等曰額棱特殷泰皆朕所特用初時人不知其善

後乃稱朕知人之明時江蘇巡撫張伯行亦以廉潔著爲

詔廷臣曰天下督撫惟額棱特張伯行操守最優耳尋

命與戶部郎中幹琿泰履勘湖南諸州廢壤四萬六千一百

餘頃疏請聽民墾闢六年後科以下則從之五十四

年山西太原府知府趙鳳詔貪墨不職奉

詔往勘得實疏言枉法受贓例應縲首但鳳詔左都御史趙

申喬子受恩深重法應加等擬監候斬九卿議改立

決明年

命署西安將軍同總督鄂海協理軍餉先是厄魯特策妄阿



拉布坦率眾犯哈密

聖祖命尙書富甯安等往勦會駐防哈密遊擊潘志喜等擊走之於是領兵大臣等議先取烏梁海土魯番諸部而後進征厄魯特其冬策妄阿拉布坦由噶順汎界山後過沙拉執青海台吉羅卜藏丹濟布而遁

聖祖慮賊由噶斯口復犯青海

詔額棱特統重兵移駐西甯爲青海諸部應援明年

命往巴里坤與將軍富甯安會議掩擊準噶爾邊界及留後接應事宜富甯安以策妄阿拉布坦令宰桑領賊眾由阿里克路迤西潛去入告

命回駐西甯且

遣侍衛諾爾布等至青海令諸台吉協力禦賊

詔之曰將軍額棱特方略過人凡有聞見其合議以行旣而青海親王羅卜藏丹津疏言策妄阿拉布坦遣所屬策凌敦多布往掠西藏欲滅拉藏汗

命與內大臣策妄諾爾布移師青海防剽掠復

敕西甯松潘各路備兵爲拉藏汗救援別

詔與青海親王及台吉等擇形勝地屯軍疏陳西甯抵藏之路有三惟庫庫賽爾嶺及拜都嶺二路較珠爾肯一路寬廣易行請與侍衛色棱分道以進賊若一路來

拒我師別由閒道直入藏地抄擊若二路來拒則其勢既分亦無難於翦滅

詔與策妄諾爾布審議以行五十七年拉藏汗爲賊戕於布達喇城執汗子蘇爾咱據有其地西藏人來歸者悉與安撫遂偕色梭分路進大軍自穆魯斯烏蘇起行至圖勒哈以皮船濟取道庫庫賽爾嶺秋抵齊諾郭勒賊眾夜窺我營遣遊擊王汝載擊敗之次日復由東路來犯自率諸軍迎戰自寅至巳賊潰遁逐北十餘里斬獲甚夥得

旨額棱特領兵頗少徑抵絕域忠勇奮發大挫賊鋒非尋常軍功可比云尋聞賊首札布齊等以眾數千潛由哈喇烏蘇來拒亟率所部將渡河扼狼拉嶺之險比至哈喇烏蘇色梭亦以兵來會遂夾擊之逆敗賊眾賊復集眾數萬環而攻我身先督戰被數創氣不少衰相持月餘賊益增而我軍無繼至凡月屬所部誓之曰守亦死退亦死等死也何如戰於是傾壘以出所射殪無算矢盡揮刀斫賊賊厲至復被數創遂沒於陳明年櫬還京

命親王及貝子等迎喪城外復

遣內大臣侍衛至其家奠茶酒雍正元年

世宗特命敘功子輕車都尉

賜祭葬如典禮諡曰忠勇入祀昭忠祠子愛山襲初額棱特繼佛尼埒爲西安將軍二十年餘父子相嬗天下莫不榮之而受知

聖祖亦於是西藏之役孤軍轉戰萬里而遙有進死無退生殆所以報嗚呼不亦相得益彰哉

察哈泰姓薩克達氏甯古塔人隸滿洲鑲紅旗天聰時從征明永平大凌河大同等處積功以驍騎校管佐領事崇德元年大軍征朝鮮先驅敗敵納穆山三年隨貝勒岳託征明越燕京趨山東攻濟南府克之

六年從圍明錦州擊敗松山援兵八年隨鄭親王濟爾哈朗取明前屯衛中後所二城順治元年隨豫親王多鐸追流賊李自成破之潼關進定西安移師江南監造戰艦三年隨端重親王博洛征福建五年隨征南大將軍譚泰討叛鎮金聲桓於江西擊敗賊眾迎戰者焚其戰艦進軍南昌數戰皆捷明年隨護軍統領敦拜勦獻縣雄縣任邱諸土賊平之還擢戶部理事官尋改太僕寺理事官論功兼遇

恩詔授輕車都尉世職十四年任參領兼太僕寺卿十六年擢本旗滿洲副都統奉

命同甯古塔總管巴海征俄羅斯至使犬部界以舟師設伏  
擊敗敵眾獲其船及器械招降斐雅喀百二十戶十  
八年追論征俄羅斯時我戰艦有失利者不以實  
聞罷任禡世職專管佐領事尋以營總隨靖東將軍濟席哈  
討山東土賊于七同護軍統領通嘉連敗賊黨呂思  
曲俞三等進擢岨嶠山賊巢平之康熙三年授本旗  
蒙古副都統十年以老乞休

聖祖慰留之明年調滿洲副都統十二年遷護軍統領夏  
詔獎久著勞績諸大臣加太子少保明年授鎮東將軍駐防  
兗州十四年

命統所部滿洲軍赴荊州隨順承郡王勒爾錦禦逆藩吳三  
桂明年春賊將陶繼智等犯宜昌率兵駐江陵通聲  
援秋七月卒於軍

賜祭葬如故事而察哈泰兄副都統穆爾泰順治十五年亦  
從征貴州卒於軍先是父喀爾岱

國初率二子及其屬來歸授佐領天聰八年從征瓦爾  
喀有功駐守海州尋移守甯古塔卒穆爾泰以次襲  
管佐領順治二年從征陝西擊流賊李自成黨賀珍  
敗之進遇他潰賊數百所部僅七十八人與戰悉殲之  
擢前鋒侍衛尋署護軍統領戰山西潞安陝西肅州

以功兼遇

恩詔子騎都尉世職擢副都統卒貴州軍

賜祭葬如故事擴爾坤則察哈泰族人也自有傳

擴爾坤祖葉占德

太祖時率戶口來歸授佐領隸滿洲鑲紅旗卒父喜福任兵部理事官崇德八年隨副都統鄂爾塞臣征黑龍江攻降圖呼爾禪城順治三年隨都統巴哈納擊敗賀珍於漢中六年從征叛鎮姜瓖與賊黨戰甯武關及左衛中創戰益厲論功初以考滿子雲騎尉世職至是兼兩遇

恩詔晉世職輕車都尉尋以創發卒十五年

卹晉世職二等以擴爾坤長子希特哈襲旋卒以次子佛倫

雅圖襲又卒於是擴爾坤以參領襲二等輕車都尉初任佐領從征貴州敗明桂王朱由榔將李成蛟於涼水井又擊其晉王李定國於雙河口走之擢護軍參領康熙十二年吳三桂反擢本旗副都統

命率兵駐防太原明年移西安尋以四川告警

詔進駐漢中夏同副都統吳國楨會總督周有德軍於廣元援應我軍之攻保甯者叛鎮吳之茂自昭化出犯廣元遣軍擊敗之秋復以眾五千餘由廣元西南水陸

兩路來犯分兵迎擊卻去尋要擊劫糧賊眾於二郎關擒偽都司賀騰龍冬偽將軍何德成復以眾四千犯廣元渡河擊敗之逐北三十餘里俄七盤朝天諸關復為賊據

詔廣元兵還漢中十四年秋漢中餉乏將軍錫卜臣領兵還城固縣擴爾坤以右翼四旗軍殿後偽總兵彭時亨擁眾八千扼險以要我軍力擊之賊既散復聚且戰且行三晝夜次洋縣之金水河七接皆勝前軍已出險猶殿拒追賊賊益眾環逼中數創力盡殞焉

賜祭葬如典禮

卹贈騎都尉兼一雲騎尉合舊襲二等輕車都尉為男爵子

遜塔齊襲

舒里渾姓棟鄂氏先世居瓦爾喀祖喀喇

太祖時率族來歸授佐領後隸滿洲正黃旗數立戰功

賜號札爾固齊天命四年禦明總兵劉綎被七創戰益厲既勝而創發以卒順治十二年追諡恭襄父札福尼天聰四年從征明灤州我軍三人被執獨馬陷陳奪之還敵不可逼以功予騎都尉世職八年從征黑龍江有功兼一雲騎尉崇德八年卒舒里渾襲初任護軍校天聰五年從征大凌河城內蒙古兵出戰擊卻之

順治二年隨英親王阿格濟追討流賊李自成至延安七戰皆捷自成遁湖廣躡之安陸獲賊船十有四明年蘇尼特部騰機思叛隨豫親王多鐸征之斬獲無算復擊敗土謝圖汗碩類汗等兵師還授佐領六年隨端重親王博洛征大同叛鎮姜瓖擊偽巡撫姜建勳敗之十一年擢護軍參領十五年擢本旗滿洲副都統隨信郡王多尼征雲南擊明桂王朱由榔將李成蛟於涼水井敗之追至雙河口敗其晉王李定國兵凱旋十八年卒累功兼遇

恩詔晉男爵矣子穆里渾襲而諸父及羣從亦多以功名顯

云阿福尼者喀喇次子札福尼弟也勇敢有父風襲世管佐領從征戰有功擢護軍參領崇德六年隨大軍與明經略洪承疇戰錦州被

優賚旋以誣斥仍奪所賚明年承疇降

太宗與論用兵大略且問六年錦州戰狀對曰是時兩軍旣交八旗兵猝進陷圍中有黃甲騎花馬者舞稍突入銳不可當師所以得出此人力也

太宗令將士與是戰者仍當時甲馬俾承疇物色之至阿福尼曰卽若人

太宗大喜召入

御前日前罷職甚非其罪遂復官仍以嚮所賚

賚之尋卒洛多懽者舒里渾弟也天聰七年隨貝勒岳託征明旅順口下其城崇德六年從圍明錦州敗其援兵明年隨貝勒阿巴泰攻明順德府先登克之

賜號巴圖魯積前功授輕車都尉世職三遇

恩詔晉世職一等兼一雲騎尉順治十七年卒無子以弟崆古圖襲崆古圖初以護軍校隨靖南將軍陳泰征福建先登克興化城擢參領康熙十三年隨副都統雅賴阿克尼征逆藩耿精忠自安慶趨江西破賊小孤山復彭澤宜黃崇仁樂安等縣十五年移師征逆藩

吳三桂擊賊將夏相國於萍鄉敗之進趨湖南十八年敗賊將吳國貴於楓木嶺復武岡州尋還京二十四年卒子多博海襲而舒里渾族人穆魯康熙十三年以筆帖式從經略莫洛征吳三桂次陝西甯羌州值王輔臣之變與莫洛並遇害

卹贈雲騎尉世職

賚圖庫姓顏札氏世居葉赫父安達哩

太祖時來歸子騎都尉世職後隸滿洲正黃旗數從

太宗征明積功晉世職輕車都尉

太宗上賓感念



恩知號呼累日以殉

世祖追晉男爵世襲罔替以賚圖庫襲賚圖庫初任侍衛天

聰五年從

太宗征明圍大凌河城偕佐領尼塔哈略地錦州敵兵數千  
突出城搏戰并力敗之復偕破明監軍道張春兵崇  
德元年從征朝鮮途遇敵騎千餘與諸將逆擊卻去  
三年隨貝勒岳託征明至通州敵瀕河列營偕佐領  
瑚彌色擊敗其眾進趨山東至濟南府敵兵來戰率  
所部爲軍鋒多所斬獲師旋破臨清城西敵營六年  
從征松山明經略洪承疇集兵十餘萬以拒我軍其

總兵曹變蛟乘夜直犯

御營力禦之手斬其前鋒餘眾遁尋隨鄭親王濟爾哈朗敗  
杏山敵兵斬馘甚眾又設伏高橋敵以夜來犯擊卻  
之手斬騎兵二人射殪五人擒二人順治元年從入  
山海關擊敗流賊李自成累功並再遇

恩詔晉爵一等子九年

世祖追念賚圖庫父安達哩忠誠殉

主也

特命立碑墓道擢賚圖庫列議政大臣尋擢內大臣兼佐領

康熙十二年

詔獎久著勞績諸大臣加太子少保二十二年卒  
賜祭葬如故事孫錫喇襲

褚庫姓薩爾圖氏先世居札魯特祖柏德遷居葉赫  
遂爲葉赫人隸滿洲鑲黃旗天聰五年年十七從大  
軍圍明大凌河城有蒙古驍將徹濟格自矜其勇獨  
馬突陳迎擊之手擒以歸尋征明大同攻萬全左衛  
先登被創卒力戰下之以功予騎都尉世職

賜號巴圖魯授佐領兼任吏部理事官順治元年隨英親王  
阿濟格追討流賊李自成師至湖廣賊將吳伯益以  
眾三千拒戰先驅擊敗之三年隨肅親王豪格征流

賊張獻忠同尙書星訥敗賊將高汝礪等於陝西進  
軍四川復數敗賊兵六年隨大軍征叛鎮姜瓖圍大  
同僞總兵楊振威以賊眾犯正紅旗並擾土默特營  
連擊卻之復犯鑲藍旗同護軍參領瑚葉援之以步  
戰敗賊眾賊平還京值宿失印鑰解理事官佐領兼  
參領如故九年隨都統噶達渾征鄂爾多斯部叛酋  
多爾濟於賀蘭山俘獲甚眾累功兼遇

恩詔晉世職二等輕車都尉十三年鄭成功犯福州時鄭親  
王世子濟度統師至漳州

命同副都統阿克善率兵往援敵以戰艦二百自烏龍江來

犯以本翼兵乘舟擊敗之逐至大江口獲船十二敵  
俄以千餘人要戰於江岸舍舟奮擊斬級二百餘康  
熙二年擢正紅旗蒙古副都統論功晉世職一等七  
年以老乞解任十四年卒

賜祭葬如故事諡曰襄壯子海存襲

興鼎姓納喇氏世居哈達父蘇巴海當

太祖時率二百人來歸會編佐領令其長子莽果轄之後隸  
滿洲鑲白旗蘇巴海仕至都察院參政興鼎其第三  
子也初任工部理事官天聰八年受知

太宗子騎都尉世職崇德元年隨英親王阿濟格征明同都

統達爾罕攻順義縣先登克之以功兼一雲騎尉三  
年考滿晉世職輕車都尉順治元年從征流賊李自  
成於陝西賊眾自延安出犯要擊大敗之明年追擊  
於武昌躡至富池口獲其船賊眾營河岸以拒同護  
軍統領哈齊阿參領希爾根擊潰其眾凱旋道出池  
州府明總兵黃斐以舟師拒戰同護軍參領布克沙  
擊走之斬級二百餘獲船十二蘇尼特部騰機思叛  
奔喀爾喀三年隨豫親王多鐸追討道敗土謝圖汗  
及碩類汗兵以功晉世職二等七年擢工部侍郎尋  
以考滿及監造勤勞並三遇

恩詔晉爵二等男十五年以會勘出征福建將士於羅源縣  
敗遁事徇情定讞罷任黜世爵十八年

聖祖卽位以興鼐處分過重復予一等輕車都尉世職兼一  
雲騎尉康熙三年卒子成格襲猶子黨愛康熙十九  
年以六品典儀從征雲南破賊將何繼祖於石門坎  
黃草壩尋會師雲南城下大破賊將胡國柄等以功  
予騎都尉世職擢護軍參領三十四年由蒙古副都  
統調右衛副都統嚴兵守歸化城噶爾丹不敢逼尋  
隨撫遠大將軍費揚古由西路勦之敗賊有功兼一  
雲騎尉卒

克宜福姓伊爾根覺羅氏先世居瓦爾喀父赫臣

太祖時率屬來歸俾任佐領轄之後隸滿洲正黃旗從征烏  
喇有功使葉赫抗節不屈爲所害葉赫尋滅

太祖令克宜福手刃仇人以祭襲管佐領天聰四年爲捉生  
將兩敗明兵手擒四人獲馬十有八八年予騎都尉  
世職世襲罔替崇德二年授吏部副理事官六年隨  
鄭親王濟爾哈朗圍明錦州其東關有蒙古諾木齊  
等謀內應敵覺而圍攻焉亟以軍突入援木齊等並  
護其家口來歸被

優賚順治二年授

福陵總管兩遇

恩詔晉世職輕車都尉尋卒次子喀齊蘭初由前鋒校繼管  
佐領授吏部理事官十三年隨甯海大將軍伊爾德  
征明魯王朱以海餘黨於舟山數戰皆捷凱旋擢護  
軍參領十三年改前鋒參領隨順承郡王勒爾錦討  
逆藩吳三桂十三年大軍自荊州渡江克松滋縣旋  
以前鋒軍薄澧州城賊迎戰力擊敗之逐北至江岸  
遂降其城師還擢本旗蒙古副都統二十一年調滿  
洲副都統二十四年以疾乞罷  
命原品政仕三十八年卒

賜祭葬如故事子凱音布襲祖克宜福輕車都尉世職仕至

禮部尙書

噶達渾姓納喇氏世居哈達

太祖時有約蘭者率子懋巴里等來歸後隸滿洲正紅旗噶  
達渾其裔孫也初任護軍參領天聰二年從

太宗征多羅特部有功八年從征明山西克應州城

賜人戶牲畜崇德五年從略明中後所有斬獲尋隨睿親王

多爾袞圍錦州擁燾先進敗杏山騎兵旋往松山要  
敵斬十餘人敵據嶺列營擊潰之同前鋒統領勞薩  
合兵追抵北山乃還七年隨豫親王多鐸征明甯遠

先諸將擊走敵兵師還我軍有達哈塔者中創仆自敵陳掖以歸敵不敢逼順治元年擢護軍統領從入山海關破流賊李自成予騎都尉世職明年隨英親王阿濟格擊流賊至九宮山三戰皆捷三年隨肅親王豪格征四川師至西安分兵趨邠州賊渠胡敬德營三水縣與副都統和託力攻破之尋與護軍統領蘇拜哈甯阿副都統阿拉善擊賊高汝礪武大定於三寨山敗之我步軍搜山賊自山巔分左右馳下與護軍統領阿爾津逆戰再敗賊眾賊復犯我正藍旗營哈甯阿被圍偕阿爾津蘇拜疾馳擊之賊解圍去

旋破賊於增蓋擢戶部侍郎五年調吏部論前戰功晉世職輕車都尉其冬

命與阿拉善率八旗兵赴英親王軍討大同叛鎮姜瓖既至七戰七勝賊自代州北關遁追斬無算遂平代州進復渾源州明年擢本旗蒙古副都統仍任戶部侍郎七年以後睿親王行圍私出射獵罷都統降世職爲騎都尉兼一雲騎尉

世祖親政擢戶部尙書明年訟鑄職冤詔復之晉二等改都察院左都御史駐防河間佐領碩爾對許戶部給餉不均下部鞠訊隱匿不奏坐削世職得

旨改罰鍰其夏復調戶部尙書

命率師征鄂爾多斯部九年擒叛酋蒙古多爾濟並殲其眾

於賀蘭山兩遇

恩詔晉男爵世襲罔替調滿洲都統十二年調兵部尙書明

年晉爵二等秋以濫引

赦例請貸行賄雲騎尉呂忠罪

飭回奏奏復稽遲下廷臣議坐削爵得

旨降一等輕車都尉會鄭成功肆海上陷福州

命同定遠大將軍世子濟度等往討

敕世子曰凡調遣機宜勿令噶達渾離左右也既至會總督

李率泰等兵復海澄分遣諸將水陸並進克福州及

泉州攻惠安海港衛套與閩安鎮陳斬數千級獲戰

艦軍械甚夥成功遁入海十三年春班師道卒

賜祭葬如典禮贈太子太保諡壯敏子噶爾漢襲噶達渾長

兵部日以京城遼闊明嘗設信礮煤山以備倉卒

定鼎後罷弗設請用

盛京時鳴鼓集眾之法

詔塔山九門仍各設礮嗚呼

聖慮蓋深遠矣金城湯池無備亦危茲制非內訌僅禦虔劉

於外亦足倚之有堂斯構尙毋忽丕丕基哉

達理善姓那穆都魯氏卽所居地也隸滿洲正黃旗  
崇德三年以閒散隸驍騎營隨睿親王多爾袞征明  
越燕京趨山東攻濟南府先登克之

賜號巴圖魯授輕車都尉世職六年從大軍圍明錦州其經  
略洪承疇遣兵自松山杏山來援連敗之順治元年  
定鼎燕京隨都統葉臣征山西克太原府明年隨副都統珠  
瑪喇和託等駐防杭州明大學士馬士英與總兵方  
國安自嚴州來犯借諸將擊走之又數敗之朱村范  
村及餘杭臨安富陽五年金聲桓反江西隨征南大  
將軍譚泰討之復南昌七年九年三遇

恩詔晉世職一等兼一雲騎尉十三年任參領十五年隨信  
郡王多尼征雲南明年明桂王朱由榔故將高應鳳  
結元江土司那嵩據城抗大軍偕都統卓羅前鋒統  
領白爾赫圖攻下其城斬應鳳那嵩亦死康熙二年  
論功晉男爵尋以老乞休十三年陝西提督王輔臣  
反甯羌請往軍前效力

命署副都統率兵赴西安明年春次隴州仙逸關時輔臣據  
平涼遣偽總兵高鼎蔡元率步騎四千迎拒於關山  
河岸偕將軍佛尼埒前鋒統領穆占與戰大破之逐  
北五十餘里復關山關進師清水縣去渭水橋二十



里遇賊哨騎擊之敗去乘勝奪其橋抵秦州城賊二千出戰皆敗復入城分兵攻東關克之四川叛鎮吳之茂以賊萬餘援平涼逼秦州而壁城賊八千出與合猛犯我營會已病強起督諸軍力戰賊眾大潰俄病篤卒於軍

賜祭葬如故事諡曰武毅二十五年論陝西功兵部以紀功二次例不晉職

特旨達理善以解任復請從征立功卒於軍殊可閔念不拘定例給一世職於是予雲騎尉合晉爲二等男孫留占襲任一等侍衛兼冠軍使以不職議銷去

恩詔所加改一等輕車都尉另襲

詔達理善已經致仕復著成勞免其銷去以留占弟代奇里襲二等男其族人達都不知與達理善遠近自有傳

達都隸滿洲鑲白旗順治四年由筆帖式授吏部副理事官八年遇

恩詔子騎都尉世職疏陳御史張嘉言事不當嘉鑄級夏擢郎中十三年河西務鈔關員外郎朱世德虧課萬餘兩照戶部議援

恩赦免罪吏部諸臣並坐瞻徇達都削世職降員外郎十八年遷刑部郎中康熙二年署參領隨都統穆里瑪討

流賊餘黨李來亨等於湖廣茅麓山明年師旋坐初  
領隊失利等罪應褫責籍沒得

旨免籍沒披甲軍前效力六年起刑部郎中八年遷光祿寺  
卿擢秘書院學士充

世祖實錄副總裁明年改

保和殿學士兼禮部侍郎充

經筵講官明年

實錄成增級食一品俸尋擢戶部右侍郎十三年大軍討逆  
藩耿精忠

命往浙江督餉文武官布政使副將以下俱聽節制鑄給總

理大兵糧餉兼管地方兵馬一切事務印秋疏言浙  
省舊設杭嚴巡道嘉湖守道金衢守道各轄二府康  
熙六年裁併杭嘉湖爲一道金衢嚴爲一道所以節  
冗費今大兵雲集一道管理三府未能兼顧請如舊  
以便料理錢糧軍務下部議如所請冬疏言原任建  
甯府通判河源濬前以朝覲回閩今年三月道出浦  
城縣聞耿逆之變已陷建甯從役勸姑往投收集家  
口斥而不從徒步七日行千二百餘里至杭州請兵  
棄妻子於賊巢不顧其忠貞可嘉經巡撫田逢吉疏  
聞部議暫留浙省俟福建恢復仍赴原任今羈縻半載無任

可赴無俸可支請與敘用得

旨何源濬情殊可閔下部從優議敘以浙省知府擢用逢吉  
尋因病解任

詔授達都浙江巡撫疏言巡撫事繁責重浙省又當用兵之  
際臣才識未裕精神已衰自揣難勝厥任現署巡撫  
之布政使陳秉直年壯才優民所悅服乞

敕部補授下部議不准

特旨允秉直陞補仍

命以原銜理餉明年疏言大軍分道進勦恢復可期催辦糧  
料綏輯流民均惟道府是賴請以留浙效用僉事姚

啓聖補溫處道通判王國泰補溫州知府運判線一

信補處州知府

詔從之其後諸人皆顯而啓聖以平臺灣爲時名臣世以爲  
有知人鑑云又疏請以勤勞最著經歷許嗣華縣丞  
鄭廷俊等二十餘員分補廳縣正任官下部議如所  
請秋疏言滿漢官兵俸餉月需銀二十萬兩本年鹽  
課會奏准按季征解難供急需請就近撥給濟軍部  
議撥長蘆鹽課山東地丁各十萬兩後大軍入閩又  
奏撥江南庫銀四十萬兩十六年大軍由閩進粵與  
副都統沃申駐湖州明年鄭錦犯海澄將軍賚塔赴

援其黨楊金目由鼇頭聯鯨犯團山與總兵馬三奇  
遣軍禦之多所斬獲追至寮口乃還十八年

召補戶部右侍郎冬至京

聖祖詢賊情形奏對甚晰明年轉左

命往盛京會議鹽務還奏

盛京新舊官兵及百姓呈訴未設鹽商之前食鹽每斤  
不過三四文自設商納課以來每斤至十餘文又鹽  
鋪俱設府州縣城貧民自屯莊往買有誤農桑且路  
遠多費因傳問鹽商等據稱鹽課勉強應納價值斷  
難減少臣思官兵皆賴田禾爲生地方百姓又係安

插招徠流徙之人盡屬窮苦而吉林甯古塔居人與  
新滿洲及邊外蒙古並遠來買食自康熙十八年招  
募商人准行鹽引一萬三千七百七十四道征課銀  
六千五百二十三兩十九年加增鹽引三千一百道  
征課銀一千四百六十八兩在官征課無幾食鹽價  
值倍增應停止鹽商辦課照舊聽有鍋之人煎鹽依  
前賤價售賣不許豪強霸佔責令奉天將軍戶部侍  
郎察禁下廷臣議從之東三省食鹽無課商絀而民  
便自達都始也仁人之言其利溥豈不然哉遷吏部  
左侍郎二十一年授左都御史其秋卒



